

ጳውሎስ ሮሙ አሳው ጳፌዳ ኪታ ገሉዋ

የሱስ ኪቲዳ ጳውሎስ ሮሙ አሳው ጳፌዳ ኪታይ፡ ጳውሎስ ሮሙን ደእያ ዋሳ ጎልያ ጸሞሳናው ቆፔዳ ድራው፡ እ ባናው ኡንቱንቱ ጊጊደ ናጋናዳን ኦላናሳ፡፡ ጳውሎሳ ቆፋይ ሮሙን ደእያ አማንያዋንቱና ጉላ ዋድያ ኦሌዳዋፕ ጉይያን፡ ኡንቱንቱ ማድና እስፔነ ባናሳ፡፡ ክርስትና አማኑዋባ ባረ ኤራዳዋነ ሄዋ ቃይ አማንያ አሳይ ኦሱዋን ፔሻና ሀናታ ቆንጭሲደ ጳፌዳ፡፡ ጳውሎሳ ቆፋይ ኩሙንላ ሀናታን ቤትያዌ ሀ ኪታና፡፡

ጳውሎስ ሮሙን ደእያ አማንያዋንቶ ሳርታ አላዋፕነ ኡንቱንቶ ዋሳናዋካ ሀድታ እሞዋፕ ጉይያን፡ ኪታው ግዶ ቆፋይ “ሞሽራቹዋ ቃላይ ጳሳይ አሳ ጽልሰያዌ፡ ኮይሩዋፕ ወርሰላ ጋካናው አማኑዋና ግድያዋ ኦዳ” (1:17)

ሄዋፕ ጉይያን ጳውሎስ ሀ ቆፋ አሲደ ጳፌ፡፡ አይሁዳቱዋ ግድናካ አይሁዳ ግድና አሳ ግድናካ ኡባይ ናጋራው ሞደትያዋንታ ግድያ ድራው፡ ኡንቱንቱ ጳሳና ሰገታናው ኮሼ፡፡ አሳይ ጳሳና ሰገታናው ዳንዳይያዌ የሱስ ክርስቶሳን አማንያዋና፡፡ ጳሳና ሙቋያ ኦራላ እትፕተላ አይፊ ኦራላ ደኡዋ ግድያዋ ጳውሎስ አሲደ ኦዳዳ፡፡ አማንያ አሳይ ጳሳና ሳር ደኤ፡፡ ቃይ ጳሳ አያና ባጋና ናጋራነ ሀይቁዋ ዋልቃፕ ብለቱ፡፡ ጳውሎስ ጳሳ ቆፋይነ አማንያ አሳ ደኡዋ ግድን ኦልያ ጳሳ አያና ዋልቃ ቆፋይ አየንቶ ኦዳ (5-8)፡፡ ሄዋፕ ካሊደ ቃይ ጳውሎስ፡ “ጳሳይ አሳ ናናው ቆፔዳ ቆፋ ግድን አይሁዳቱነ አይሁዳ ግድና አሳቱ ዋኒደ እትፕ ዋጸታናው ዳንዳያናዋንቱሻ?” ያግያ ኦሻ ዛራናው ባጸቲደ ደኤ፡፡

ቃይካ ጳውሎስ፡ አይሁዳቱ የሱሳ አከናን አጌዳዌ ጳሳ ቆፋ ግድያዋ ኦዳ፡፡ አያው ጎፕ፡ ሀዋ ማላ ሀናታን አሳ ዘረላይ ኡባይ ጳሳይ የሱሳ ባጋና ቆንጭሴዳ አቶ ኬካተላን እትፕተላ ኦላናሳ፡፡ ግዶ ሸን፡ አይሁዳቱ የሱሳ አካናው ዋዲ ያናዋ ጳውሎስ አማኔ፡፡ ወርሰላን ጳውሎስ ክርስትና ደኡዋ ዋኒደ ደአናው በሰንቶ ኦዳ፡፡ ጳሳው ኦላናባ፡ አማንያ አሳቱ ባረንቱ ጋድያሰነ ባረንቱ ግድን አቱ

እቶ ሲቁዋንን ማታን ኦላናባን ቆፋ ጋሱዋን ደንድያ ኦሻቱዋባ ቆንጭሲደ ኦዴ።

ሸምፓቱዋ ኡባቶ እመቴዳ ቃንላ ቆፋቱዋ

ሮመ ኪታ ሁጰ ቆፋ ገሉዋ 1:1-17

እቶተላይ አሳዉ ኮሽያዋ ግድያዋ 1:18—3:20

ጸሳ አሹዋ ኦግያ 3:21—4:25

የሱሳን ቤትያ ኦራላ ደኡዋ 5:1—8:39

እስራኤልያ አሳዉ ደእያ ጸሳ ቆፋ 9:1—11:36

ክርስትናዉ በስያ ኦሱዋ 12:1—15:13

ዉርስላ ቆፋን ሳርታ 15:14—16:27

1 ባረ ምሽራቹዋ ቃላ ኦዳናዉ ጸሳይ ዶሪደ ጼሴዳ ክርስቶሳ የሱሳ ቆማይ፣ የሱስ ክርስቶስ ኪቴዳ ጳዉሎስ፣ ታን ሀ ዳብዳቢያ ጸፋይ።

2 ጸሳይ ዳር ዋደፐ ካስ ባረ ናባቱዋ ባጋና ምሽራቹዋ ቃላ እማና ያጌዳዌ ጸሳ ጌሻ ማጻፋቱዋን ጸፈቲዳ፤

3 ሄ ምሽራቹዋ ቃላይ አሳ ግዲደ ዳዊተ ዛርያፐ የለቴዳ ጸሳ ናኦ፣ ኦ ጎዳ የሱስ ክርስቶሳባ።

4 ቃይ እ ባረ ጌሻ እያናን * ሀይቁዋፐ ደንዴዳዋን፣ ጸሳ ናኦ ግድያዋ ዋልቃማ ዋልቃን በሴዳ።

5 እይሁዳ ግደና አሳይ ኡባይ እማናናዳን፣ እዛዘታናዳን፣ ኦን ኤንቱንታ ካለላና ማላ፣ ጸሳይ ክርስቶሳ ሱንላ ድራዉ፣ ክርስቶሳ ባጋና አጼ ኬካተላን የሱስ ኪቴዳዋንታ ግድያ ማታ ኦዉ እማዳ።

6 የሱስ ክርስቶሳዋ ግዳናዳን፣ ጸሳይ ጼሴዳ ሀንተንቱካ ሄዋንቱ ግድን ደኢታ።

7 ጸሳይ ሲቅያዋንቱን ጌሻባ ኦላናዉ ጼሴዳ ሮመ ጋድያን ደእያ ኡባቶ ጸሳ ኦ አዉዋፐን ጎዳ የሱስ ክርስቶሳፐ አጼ ኬካተላይን ሳርተላይ ሀንተንቶ ግድ።

ጋላታ ዋሳ

8 ካስታደ ታን ሀንተንቱ እማኦ ሳኦ ኡባን ስስቴዳ ድራዉ፣ የሱስ ክርስቶሳ ባጋና ሀንተንቶ ታን ጸሳ ጋላታይ።

9-10 እያዉ ሳፐ፣ ታን ኡባ ዋደ ታ ዋሳን ሀንተንታ ሀሳይሰያዋ፣ ጸሳይ፣ ታን ኦ ናኦ ምሽራቹዋ ቃላ ኦድያዋን ታ እያናን እዉ ኦላያዌ ማርካ። ጸሳይ፣ ባረ ሸንያን፣ ታን ሀኦ ሀንተንቱኮ ባናዉ ታ ኦግያ ሚኮያናዳን፣ ኡባ ዋደ ዋሳይ።

* 1:4 ባረ ጌሻ እያናን- ዋይ “ኦን ደእያ ጌሻ እያና”

11 እያዉ ጎጥ፡ ታን ህንተንታ ሞንሳናዉ፡ ህንተንቱና እትጥ ኢያና እሞታ ሻካና ማላ፡ ህንተንታ በከናዉ ላሞታይ።

12 ታን ግያዌ፡ ህንተንቱካ ታካ እት ዎደ ሞነታና። ህንተንቱ ታ አማኑዎን፡ ቃይ ታንካ ህንተ አማኑዎን ሞነታና።

13 ታናዳን አማንያዎንቶ፡ ታን ኡባ ዎደ ህንተንቱኮ ባናዉ ቆጋድ። ሸን ታና ድግያባይ ደእያዎ ህንተ ኤራናዉ በሴ፤ ታን ሀራይ እቶ አይሁዳ ግደና ሀራ አሳጥካ አይፍያ ደሜዳዎዳን፡ ህንተንቱጥካ አይፍያ ደማናዉ ኮያይ።

14 ታን አሳ ኡባዉ፡ ግሪክ አሳዉን ታማርቤና አሳዉ ቃይ አዶ ኤራንቻቶን ኤያቶ ቃንጸና አጩ ደኤ።

15 ሄዎ ድራዉ፡ ታዉ ዳንዳየቱዳ ኬናን ሮመን ደእያ ህንተንቶካ ሞሽራቹዎ ቃላ ኦዳናዉ አሞታይ።

ሞሽራቹዎ ቃላይ ጸሳ ዎልቃ

16 ሞሽራቹዎ ቃላይ ታና ዬላየና፤ እ አማንያ ኡባ፡ ካሰቲደ አይሁዳ አሳ ቃይ አይሁዳ ግደና አሳ አሻናዉ ጸሳጥ ይያ ዎልቃ።

17 እያዉ ጎጥ፡ ጸሳ ማጻፋይ፡ “ጽሉ ጸሳን አማኑቲደ ደከና” ያግያዎዳን፡ ጸሳይ አሳ ኮይሮጥ ዉርሰላ ጋካናዉ፡ አማኑዎን ጽልሰያዎ ሞሽራቹዎ ቃላይ ቆንጮሴ።

አሳ ኢታ ኦሱዎ

18 ቱማተላይ ኤሪታናዎ ባረንቱ ኢታ ሀኖታን ድግያ ናጋራ ኦሱዎ ኡባ ቦላንን አሳ ኢታ ኦሱዎ ኡባ ቦላን፡ ጸሳ ሀንቁ ሳሉዋጥ ዎደደ ቆንጮና።

19 ኡንቱንቱ ጸሳባ ኤራና ዳንዳይያዌ ኡንቱንቶ ቆንጮ፤ እያዉ ጎጥ፡ ጸሳይ ኡንቱንቶ ቆንጮሴዳ።

20 ቤተና አ ሀኖታይ፡ ሄዌካ አ መድና ዎልቃይን አ ጸሳተላይ እትጥ ጸሳይ ሀ አላምያ መዴዳዎጥ ደሚደ፡ ኡንቱንቶ ቆንጮደ ቤቱዳ፤ ኡንቱንቱ ሄዎ ጸሳይ መዴዳባጥ በከናዉ ዳንዳይያ ድራዉ፡ ኡንቱንቶ ጋሶይያባይ ባዎ።

21 እያዉ ጎጥ፡ ኡንቱንቱ ጸሳ ኤሮጥካ፡ አዉ በሰያ ቦንቹዎ አምበይክኖ፤ ቃይ አ ጋላትክኖ። ሸን ኡንቱንቱ አላላ ከሰናባ ቆጥኖ፤ ቃይ ኡንቱንቱ አኬከና ዎዛናይ ጹሜዳ።

22 ኡንቱንቱ ባረንታ አዴዳ ኤራንቻ ገኖ፤ ሸን ኡንቱንቱ ኤያ።

23 ኡንቱንቱ ሀይቀና ጸሳዉ ጎይንያዎ እጺደ፡ ሀይቂያ አሳ መ□ታ፡ ካፋቱዎ መ□ታ፡ ደክቱዎ መ□ታን ትራን ጎሽትያዎንቱ መ□ታ መ□ቱዳዎንቶ ጎይኔድኖ።

24 ሄዋ ድራው፡ ኡንቱንቱ እቱ እቱዋና ፖኮባ ኦላና ማላ፡ ጸሳይ ኡንቱንቱ ዋዛናይ አሞትያ ቱናባ ኦላናዳን ኡንቱንታ አጌዳ።

25 አያው ጎፕ፡ ኡንቱንቱ ጸሳ ቱማተላ ዋርዲዋን ላሚድኖ፤ ቃይ መጺዳ ጸሳ አጊደ፡ እ መጺዳባው ጎይኔድኖን ኦሴድኖ። ጸሳይ መጽናው ጋላተቲዳዋ። አመንእ።

26 ሄዋ ድራው፡ ጸሳይ ኡንቱንቱ ፖኮባ አሞታና ማላ፡ ኡንቱንታ አጌዳ፤ ሀራይ እቶ ኡንቱንቱ ማጫዋንቱ ባረንቶ በሰያዋ አጊደ፡ በሰናዋ ሀኔድኖ።

27 ሀዋዳንካ፡ አቱማ አሳይ ቃይ ባረንቶ በሰያዋዳን ማጫዋንቱና ጋከትያዋ አጊደ፡ እቱ እቱዋና ጋከታናው ኮዬድኖ፤ አቱማ አሳይ እቱ እቱዋና ፖኮባ ኦሴደ፡ ባረንቱ ኦሴዳ ባላን ባረንቶ በሰያ ፕርዳ አኬድኖ።

28 ኡንቱንቱ ጸሳ ኤራናው ደሰናን እጼዳዋ ኬና ጸሳይ ኡንቱንቱ በሰናዋ ኦላና ማላ፡ ኡንቱንቶ ፓ□ና ቆፋ እሜዳ።

29 ኡንቱንቱን ቱናተላይ፡ ኢታተላይ፡ ዮራተላይን ኢታ ሀኖታይ ኩሜዳ፤ ቃይ ኡንቱንቱን ቃናቲ፡ ሸምፑዋ ዋድያ ቆፋይ፡ ፓሉማይ፡ ጭሙሳይን ኢታ ቆፋይ ኩሜዳ፤ ቃይ ኡንቱንቱ ሶቅያዋንታ፡

30 ዝግርያዋንታ፡ ጸሳ እጽያዋንታ፡ ቦርያዋንታ፡ ኦቶረትያዋንታ፡ ጨቀትያዋንታ፡ ኢታባ ኦላናው ኮይያዋንታን ባረንቱ እዎን አትው አዛዘተናዋንታ፡

31 ቆፋይ ባይናዋንታ፡ አማኑ ባይናዋንታ፡ ሀራንቶ ቃረተናዋንታን ማረናዋንታ።

32 ኡንቱንቱ ሀዋንቱ ማላ ኦሳያዋንቶ ሀይቁ በሴ ግያ ጸሳ ሀግያ ኤሪደ፡ ሀዋንታ ኦሴኖ፤ ሄዋ ጸላላ ግደናን፡ ሀዋንታ ኦሳያዋንታካ አላተ ጊደ ምንሲኖ።

2

ጸሳ ፕርዳ

1 ሄዋ ድራው፡ ኔኖ ሀራንቱ ቦላ ፕርድያዎ፡ ነው ጋሶይያባይ ባዋ፤ አያው ጎፕ፡ ኔን ሀራንቱ ቦላ ፕርዳደ፡ ሄ ኔን ኡንቱንቱ ቦላ ፕርድያዋ ማላ ኦሶፕ፡ ነ ቦላ ፕርዳሳ።

2 ኑን ሀዋ ማላ ኦሶዋ ኦሳያዋንቱ ቦላ ጸሳይ ጽሎ ፕርዳ ፕርድያዋ ኤሪቶ።

3 ኔኖ፡ ሀዋ ማላ ኦሶዋ ኦሳያዋንቱ ቦላ ፕርድያዎ፡ ቃይ ሄ ኔን ፕርድያዋ ማላ ኦሳያዎ፡ ኔን ጸሳ ፕርዳፕ አትያዋ ማላቲ።

4 ዋይ ጸሳ ዋልቃማ ኬካተላ፡ ገንጨዋነ ዳንዳያ ካጳይሻ?
ጸሳይ ኔና ናጋራፕ ዛራናው ኮይያ ድራው፡ እ ኬካ ግድያዋ ኔን ኤራሳ።

5 ሸን ህንተንቶ ጉዙማ ዋዛናይነ ናጋራፕ ሰመና ዋዛናይ ደኤ፤ ሄዋ ድራው፡ ጸሳ ህንቁነ ጽሎ ፕርዳይ ቆንጭያ ጋላሰ፡ ኔን ነ ቦላ ህንቁዋ ካሰዋፕ ዳርሳሳ።

6 ጸሳይ አሳ ኡባው አ ኦሱዋ ማላ እማናዋ።

7 እት እት አሳቱ ሎኦባ ዳንዳያን ኦሲኖ፤ ቃይ ጋላታ፡ ቦንቹዋነ ባየና ደኡዋ ኮዪኖ፤ ኡንቱንቶ ጸሳይ መድና ደኡዋ እማና።

8 ሸን ሀራንቱ ኢታባ ኦላናው ያረቲኖነ ቱማተላ እጺኖ፤ ጸሳይ ኡንቱንቱ ቦላ ባሻነ ህንቁዋ የዳና።

9 ኢታባ ኦላያ አሳይ ኡባይ መቶታናነ ዋየታና፤ ሄዌ ካሰቲደ፡ አይሁዳ አሳ ጋካና፤ ሄዋፕ ቃይ አይሁዳ ግደና አሳ ጋካና።

10 ሸን ጸሳይ ሎኦ ኦሱዋ ኦላያ ኡባቶ ጋላታ፡ ቦንቹዋነ ሳርተላ እማና። ካሰቲደ አይሁዳቶ እማና፤ ሄዋፕ ቃይ አይሁዳ ግደናዋንቶ እማና።

11 እያው ጎፕ፡ ጸሳ አይፍያን አሳይ ኡባይ እት ማላ።

12 ሙሴ ህጊ ባይናን ናጋራ ኦሌዳ ኡባይ ህጊ ባይናን ጳያና። ሙሴ ህጊ ደእሸን፡ ናጋራ ኦሌዳ ኡባይ ህግያን ፕርደታና።

13 እያው ጎፕ፡ ጸሳ ሰንላን ህግያ ናግያዋንቱ ጽለኖፕ አትን፡ ህግያ ሰሰያዋንቱ ጽልክኖ።

14 አይሁዳ ግደና አሳው ህጊ ባዋ፤ ሸን ባረንቱ ትላ ቆፋን ህጊ አዛዝያዋ ኦሲኖ፤ ኡንቱንቶ ህጊ ጳዮፕካ፡ ኡንቱንቱ ባረንቱ ሁጳው ህገ።

15 ህጊ አዛዝያዌ ኡንቱንቱ ዋዛና ግደን ጸፈቲዳዋ ኡንቱንቱ ሀኖታይ በሴ፤ እት እት ካላ ኡንቱንቱ ትላ ቆፋይ ኡንቱንቶ ማርካትያ ድራውነ ቃይ እት እት ካላ ኡንቱንቱ ቆፋይ ኡንቱንታ ዋትያ ድራው፡ ዋይ ቃይ ኡንቱንቱና ጋዳትያ ድራው፡ ሄዌ ቱማ ግድያዋ ኤርሴ።

16 ታን ታማርሴዳ ሞሽራቹዋ ቃላዳን፡ አሳ ዋዛናን ጌሜዳ ቆፋ ጸሳይ የሱሰ ክርሰቶሳ ባጋና ሀዋዳን ፕርዳና።

አይሁዳቱዋነ ሙሴ ህግያ

17 ሸን ኔን ኔና አይሁዳ ጋሳ፤ ህግያን ዘምፓደ ጸሳን ጨቀታሳ።

18 ኔን ኦላና ማላ፡ ጸሳይ ኮይያዌ አየንቶ ኤራ፤ ቃይ ቱማ ግድያዋ ደራናው ህግያፕ ታማራዳ።

19-20 ኔን ፍቃቱዋ ካለለያዋ፡ ቃይ ጳጳማን ደእያዋንቶካ ፖእሰያዋ፡ ኤረናዋንታ ኤርሰያዋን ናናቱዋ ታማርሰያዋ ግድያዋ ኤራድ፤ ሀግያፕ ኔን ኩመንጎላ ኤራተላን ቱማተላ ደምያዋ ኤራሳ።
 21 ያትና፡ ኔን ሀራቱዋ ታማርሰያዋ ኔና ነ ሁጳዉ እያዉ ታማርሰኪ? ኔን፡ “ዉኦፓ” ያጋደ ቃላ ኦዳሳ። ሸን ኔን ነ ሁጳዉ ዉእይየ?

22 ኔን፡ “ዋሹዋፓ” ያጋ። ሸን ኔን ነ ሁጳዉ ዋሹማይ? ኔን ኤቃ ሸነታ። ሸን ኤቃይ ደእያ ጎልያ ቦንቃይ?

23 ጸሳ ህጊ ነዉ ደእያ ድራዉ፡ ኔን ጨቀታሳ፤ ሸን ሄ ሀግያ መንላደ ጸሳ ዬላያይ?

24 እያዉ ጎፕ፡ ጸሳ ማጻፋይ፡ “አይሁዳ አሳቶ፡ ህንተ ጋሱዋን አይሁዳ ግድና አሳቱዋ ግድን ጸሳ ሱንላይ ባዬ” ያጌ።

25 ኔን ህገዉ አዛዘቶ፡ ነ ቃጻራይ ማዲዋና ደኤ፤ ሸን ኔን ሀግያ መንላፕ፡ ኔን ቃጻረቴዳዌ ቃጻረትቤናዋዳን ፓይደቴ።

26 አይሁዳ ግድና አሳይ ቃጻረተናን ህጊ አዛዘያዋ ናጎ፡ ጸሳይ አ ቃጻረቴዳዋዳን ፓይደኔ?

27 ህንተንቱ፡ አይሁዳ አሳቱ፡ ህንተንቶ ጸፈቴዳ ህጊ ደእፕካ ቃይ ህንተ ቃጻረቶፕካ፡ ሀግያ ህንተ መንላያ ድራዉ፡ አይሁዳ ግድና አሳይ ቦላ ቃጻረታና ጳዮፕካ፡ ህገዉ አዛዘቲደ፡ ህንተ ቦላ ፕርዳና።

28 እያዉ ጎፕ፡ አይሁዳ አሳ ማላትያ ኡባይ ቱሙ አይሁዳ አሳ ግድና፤ ቃይ አሳይ ባረ አሹዋ አሳተላ ቃጻረቴዳ ድራዉ፡ ቱሙ አይሁዳ አሳ ግድና።

29 ሸን ቱሙ አይሁዳ አሳ ግያ ኡራይ ጋርሳ ባጋና አይሁዳ አሳ * ግዴዳዋ፤ ቃጻረትያዋ ጸሳ እያናን ኦሰትያ ዋዛና ቃጻራፕ አትን፡ ጸፈቴዳ ሀግያና ግድና፤ ሄ ኡራይ ባረ ጋላታ ጸሳፕ አክያዋፕ አትን፡ አሳፕ አክቤና።

3

አይሁዳቱ አማናን አጉሳን ባይዜድኖ

1 ያትና፡ አይሁዳ አሳቱ እያን አይሁዳ ግድና አሳፕ አጲኖ? ዋይ ቃጻረትያዋን አይ ማዲ ደኢ?
 2 ሀዌ አይሁዳቱዋ ኡባባን ሎይላ ማዴ፤ ኡባባፕ ካሰ ጸሳይ ባረ ኪታ ሀዳራ አይሁዳቶ አሜዳ።

2:24 እሳ. 52:5 * 2:29 አይሁዳ ጉሳይ ጋላተትያዋ ግዲደ ሱንላይ ይሁዳፕ ዬዳ። 2:29 ዛረ. 30:6

3 ያትና ኢንቱንቴፕ እቱ እቱ አማካኝና ግደፕ፣ ዋኒ? ሄዋ ድራው፣ ጸሳይ አማካኝና ያግያዌ?

4 ሄዋ ግደና፤ አሳይ ኡባይ ዋርዳንቻ ግደፕ፣ ጸሳይ ግያዌ ቱማ ግደናው በሴ። ጸሳ ማጸፋይ፣ “ኔን ሃሳይያ ዋደ፣ ኔን ጽሎ ግድያዋ ኤርሳናው ኮሼ፤ ኔን ሞተትያ ዋደ፣ ሻትማናው በሴ” ያጌ።

5 ሸን ኑ ባይዙ ጸሳ ጽሎ ኦሱዋ ኤርሰንቶ፣ ኑን ዋጋኔ? ኑ ቦላ ሀንቁዋ እህያ ጸሳይ ባይዘንቹ? ታን አሳይ ግያዋዳን ጋይ።

6 ሄዌ ዋዪ ሀናና። አያው ጎፕ፣ ሄዋዳን ግደፕ፣ ጸሳይ ሀ አላምያ ቦላ ዋት ፕርዳኔ?

7 ሸን ታ ዋርዱዋን ጸሳ ቱማተላይ አ ቦንቾ ዳርፕ፣ ያትና፣ ሀዋ ጋካናው አያው ታ ቦላ ናጋራንቻዳን ፕርዲ?

8 ያትና ኑን፣ “ሎኡ ያናዳን፣ አነ ኢታባ አላይተ” አያው ጎኮ? እት እት አሳይ ሀዋ ታና ሞቲደ ቦሬድና፤ ኢንቱንቱ ጸሳፕ በሰያ ፕርዳ አካና።

አሳይ ኡባይ ናጋራንቻ

9 ሄዋ ድራው፣ ኑን ዋጋኔ? ኑን አይሁዳቱ፣ አይሁዳ ግደና አሳፕ ዳሬቶ? ሄዋ ግደና፤ አያው ጎፕ፣ አይሁዳቱካ አይሁዳ ግደና አሳቱካ ኡባይ እትፕ ናጋራፕ ጋርሳን ደእያዋ ታን ካሰ ህንተንቶ ኡዳድ።

10 ጸሳ ማጸፋይ ሀዋዳን ያጌ፤

“ጽሎ አሳይ እቱነ ባዋ።

11 አኬክያ አሳይካ ባዋ፤

ዋይ ጸሳ ኮይያዌካ ባዋ።

12 አሳይ ኡባይ ኦግያፕ ካረ ከሴድና፤

ኡባይ ሙለካ ማደናዋ ግዳዳ።

ሎኦባ አላያ ኦንነ ባዋ፤

ሀራይ አቶ እቱነ ባዋ።

13 ኢንቱንቱ ደናይ ደያ ደእያ ዲፋዋ ማላ።

ባረንቱ እንጸርሳን ዋርድቲድና።

ኢንቱንቱ ደናፕ አሳ ዋድያ ሾሻ

ይሻ ማላ ሃሳይ ከሴ።

14 ኢንቱንቱ ደናን ሸቃይነ ጫሞባይ ኩሜዳ።

15 ኢንቱንቱ ሱላ ጉሳናው፣

ዳሪ ኤሌሊና።

3:4 ማዘ. 51:4 3:10 ማዘ. 14:1-3 3:13 ማዘ. 5:9 3:14 ማዘ. 10:7 3:15 አሳ. 59:7-8

- 16 ባይዘነ ኮለላይ፥
ኢንቱንቱ ቤዳሳን ሀቃንነ ጳዩና።
- 17 ኢንቱንቱ ሳሮተላ ኦግያካ ኤርክኖ።
- 18 ቃይ ጸሳዉ ያይያባይ፥
ኢንቱንቱ ቆፋን ባዋ”

ያጌ።

19 እሳ ኡባ ሃሳያ ድጋና ማላነ ኩመንላ ሳኣ ጸሳ ፕርዲፕ ጋርሳዉ እላና ማላ፥ ህግያ ግድን ኦድቴዳ ኡባባይ ህግያፕ ጋርሳን ደእያ አሳዉ ሃሳይያዋ ኩን ኤሬቶ።

20 ጸሳ ሰንላን ኦንነ ህጊ አዛዝያዋ ኦላያዋን ጽላና፤ ህጊ እት አሳይ ናጋራ ኦሌዳዋ ኤራናዳን ኦሌ።

አሳይ ጽልያዌ አማኑዋና

21 ሸን ጸሳይ አሳ ጽልሰያ ኦጊ ህጊ ባይናን ሀእ ቆንጨዳ፤ ህጊን ናባቱ ሄ ጽሎተላባ ማርካቴድና።

22 ጸሳይ አሳ የሱሰ ክርሰቶሳ አማንያዋን ጽልሴ፤ ጸሳይ ሄዋ አ አማንያ ኡባዉ ኦሌ፤ አይ ሻኮተላይነ ባዋ።

23 አያዉ ጎፕ፥ አሳይ ኡባይ ናጋራ ኦሌዳ፤ ጸሳ ቦንቹካ ኢንቱንቶ ጉጾዳ።

24 ሸን ኢንቱንቱ ጸሳይ አምያ አ አጵ ኬካተላን፥ ባረንታ ዋዝያ ክርሰቶሰ የሱሳ ባጋና ጮ ጽሌድና።

25 የሱሳ ሱላን አሳይ አ አማኒደ፥ ባረ ናጋራዉ ማሮተላ ደማናዉ፥ ጸሳይ አ እሜዳ፤ ጸሳይ ሄዋ ባረ ጽሎተላ በሳናዉ ኦሌዳ፤ እ በን ዋድያን አሳ ናጋራ ዳንዳዪደ፥ ካድ ባሽ አጌዳ፤ ሸን

26 ሀ ዋድያን ባረ ጽሎተላ በሳናዉ አሳ ናጋራ አገና፤ ጸሳይ ሄዋ ኦላያዋን እ ባረ ሁጸዉ ጽሎ ግድያዋን የሱሳ አማንያ ኡባ ጽልሰያዋ ቦሴ።

27 ያትና፥ ኩን አያዉ ጨቀታኔ? አይነ ባዋ። አያ ጋሱዋኔ? ኩን ህገዉ ኤኖ ግያዋኔ? ግደና፤ አማኑዋ ህግያናፕ አትን።

28 አያዉ ጎፕ፥ አሳይ አማኑዋን ጽላናፕ አትን፥ ህጊ አዛዝያዋ ኦላያዋና ግደና ያጊደ ቆፕቶ።

29 ዋይ ጸሳይ አይሁዳቱዋ ጸላላዉ ጸሴ? አይሁዳ ግደና አሳዉ ጸሳ ግደኔ? ቱማ፥ አይሁዳ ግደናዋንቶካ እ ቃይ ጸሳ።

3:18 ማዘ. 36:1 3:20 ማዘ. 143:2፤ ጋላ. 2:16

30 እት ጸሳ ጸላላይ ደኤ፤ አይሁዳቱዋ ኡንቱንቱ አማኑዋን እ ጽልሳና፤ ቃይ አይሁዳ ግደናዋንታካ ኡንቱንቱ አማኑዋን ጽልሳና።

31 ያትና፡ ኑን ሀግያ አማኑዋን ጋጸ ሱጋኔ? ግደና፤ ሀግያ ሞንሶይተፕ አትን።

4

አብራሃም አማኑዋን ጽሌዳ

1 ያትና፡ ኑን ኑዉ አሹዋን ዛረ ግድያ አብራሃም አያ ደሜዳ ጋኔ?

2 አያዉ ጎፕ፡ አብራሃም ኦሱዋን ጽሌዳዋ ግደፕ፡ አዉ ጨቀትያባይ ደኤ፤ ሸን ጸሳ ሰንሳን ጨቀታና ዳንዳየና።

3 አያዉ ጎፕ፡ ጸሳ ማጸፋይ ዋጊ? “አብራሃም ጸሳ አማኔዳ፤ ጸሳይ ሄዋ አዉ ጽሎተሳን ፓይዴዳ” ያጌ።

4 ኦሳያ ኡራይ እክያ ሚሻ ባረዉ በሰና አኬፕ አትን፡ አዉ ጮ አመትያዋዳን ፓይደተና።

5 ሸን ኦሱዋ ኦ□ናን፡ ናጋራንቻ ጽልሰያ ጸሳ አማንያ ኡራ፡ ጸሳይ እ አማኑዋን እ ጽልሴ።

6 ሀዋዳንካ፡ አይ ኦሱን ባይናን፡ ጸሳይ ጽሎዋዳን ፓይዴዳ አሳ ናሽቻያባ ዳዊተ ሃሳዬዳ ዋደ ጌዳዌ ሀዋ።

7 “ጸሳይ ኡንቱንቱ ባይዙዋ
አቶ ጌዳዋንቱ፤
ኡንቱንቱ ናጋራ ካሜዳዋንቱ
አንጀቴዳዋንታ።

8 ጎዳይ እ ናጋራ ፓይደና አሳይ
አንጀቴዳዋ”

ያጌ።

9 ያትና፡ ሀ ዳዊተ ሃሳዬዳ አንጂ ቃጸረቴዳ አሳ ጸላላሴየ? ዋይ ቃይ ቃጸረትቤና አሳቱዋሴ? አያዉ ጎፕ ኑን፡ “ጸሳ ማጸፋይ፡ ‘አብራሃም ጸሳ አማኔዳ፤ ጸሳይ ሄዋ አዉ ጽሎተሳን ፓይዴዳ’ ያጌ” ጎይተ።

10 ያትና፡ ሀዌ አዉደ ሀኔዴ? አብራሃም ቃጸረት ሰምነየ? ዋይ ቃጸረታናፕ ካሰኔ? ቃጸረታናፕ ካሰናፕ አትን፡ ቃጸረትና ግደና።

3:30 ዛረ. 6:4፤ ጋሊ. 3:20 4:3 ደመላ 15:6፤ ጋሊ. 3:6 4:7 ማዝ. 32:1-2

11 ጉዮፕ እ ቃጸረቴዳ፤ ጸሳይ አ አማኑዋ ድራዉ፣ እ ቃጸረታናፕ ካሰ አ ጽሎ ኦሴዳዋ ኤርሳናዉ፣ አ ቃጸራይ ማላ ግዴዳ። ሄዌካ ቃይ ቃጸረተናን ጸሳ አማንያ ኡባቱዋ ጸሳይ ጽሎ ኦሴዳ ፓይዳናዳን፣ ኡንቱንቶ አብራሃሞ አዉዋ ግዳናሳ።

12 እ ቃጸረቴዳዋንቶካ አዉዋ፤ ግድፕካ፣ ኡንቱንቱ ቃጸረቴዳ ድራሳ ግደና፤ ሸን ኑ አዉዋ አብራሃሞ ቃጸረታናፕ ካሰ አማንያ አማኑዋ ማላ ካልያዋንቶካ አዉዋ።

ጸሳይ እማና ጌዳባይ አማኑዋን አከቱ

13 አብራሃሞስነ አ ዘረላዉ ጸሳይ፣ “ሀ ሳአ ታን ሀንተንቶ እማና” ያጌዳዌ፣ አብራሃሞ ጸሳ አማኒደ ጽሌዳ ድራሳፕ አትን፣ ሀገዉ እ አዛዘቱዳ ድራሳ ግደና።

14 አያዉ ሳፕ፣ ሀገዉ አዛዘትያዋንቱ ጸሳይ እማና ጌዳዋ ላትያዋንታ ግድፕ፣ አሳ አማኑ ማደናባ ግዴዳ፤ ጸሳይ ጌዳዌካ ሙላ ግዴዳ፤

15 ሀጌ ጸሳ ቦሻ አሄ፤ ሸን ሀጌ ባይናሳን ሀግያ ሙንሐያባይ ባዋ።

16-17 ሄዋ ድራዉ፣ ሀግያ ናግያዋንቱ ጸላላዉ ግደናን፣ ቃይ አብራሃሞ አማኔዳዋዳን፣ አማንያ አብራሃሙ ዘረላ ኡባዉ ጸሳይ እማና ጌዳዌ፣ ዋይታዳን ቱማታናዌ አማኑዋና። አብራሃሞ ኑዉ ኡባዉ አዉዋ። ጸሳ ማጸፋይ፣ “ታን ኔና ጮራ ካዉተላቶ አዋ ኦላድ” ግያዋዳን፣ ሀይቄዳዋንቶ ደኡዋ እምያ፣ ባረ አዛዘቱን ባይናባ ደእያባዳን ኦሴዳ ጼሰያ፣ እ አማኔዳ ጸሳ ሰንላን አብራሃሞ ኑዉ ኡባዉ አዉዋ።

18 ጸሳ ማጸፋይ አብራሃሞ፣ “ነ ዘረላይ ሀዋ ኬና ግዳና” ያጌዳዋዳን፣ ሀዋ ኬና ግዳና ጌደ፣ ናሸቻን ናጋናዉ ዳንዳየና ዋደ፣ አብራሃሞ አማኒደነ ሰንላፕ ደማና ጌደ፣ ናሸቻን ናጌደ፣ ጮራ ዘረላዉ አዉዋ ግዴዳ።

19 ሄ ዋደ፣ አብራሃሞ የለቶደፕ ጼቱ ላይላ ኩማና ሀንያ ጮማ፤ ሸን ባረ ዳቡራንቻ አሳተላን ሳራ ናአ የላናዉ ዳንዳየናዋ ቆፔዳ ዋደ፣ እ ባረ አማኑዋን ዳቡርቤና።

20-21 ጸሳ እ ቦንቲደ፣ አዉ እማና ጌዳ ጸሳይ ቃይ ፖላናዉ ዳንዳይያዋ ሎይሐ ኤሪደ ባረ አማኑዋን ሞኔዳዋፕ አትን፣ አማንናን እጺደ፣ ጸሳይ እማና ጌዳዋ ሰድቤና።

22 ሄዋ ድራዉ፣ ጸሳይ ቃይ አ አማኑዋ ጽሎተላን ፓይዴዳ።

4:11 ደመላ 17:10 4:13 ደመላ 17:4-6፤ 22:17-18፤ ጋሊ. 3:29
4:16-17 ደመላ 17:5 4:18 ደመላ 15:5 4:19 ደመላ 17:17

23 “አዉ ጽሎተላን ፓይዴዳ” ግያ ቃላይ ኦ ጸላላዉ ጸፈትቤና።

24 ሄ ቃላይ ኑ ጎዳ የሱሳ ሀይቁዋፕ ደንጮዳ ጸሳ አማንያ ኑዉካ ጽሎተላን ፓይደታና ማላ ጸፈቲዳ።

25 ጸሳይ ኦ ኑ ናጋራ ድራዉ፣ ሀይቆ አሊደ እምና፣ ኦ ኑና ጽልሳናዉ ሀይቁዋፕ ደንዴዳ።

5

አማኑዋን ቤትያ ሳርተላን ሰጋተላ

1 ሄዋ ድራዉ፣ ኑን አማኑዋን ጽሎዳዋን፣ ኑ ጎዳ የሱሰ ክርስቶሳ ባጋና ኑዉ ጸሳና ሳርተላይ ደኤ፤

2 ቃይ ኦ ኑና ሀእ ኑን ደእያ ጸሳ አጼ ከካተላ ግዶ አማኑዋን አሄዳ፤ ያትና፣ ኑን ጸሳ ቦንቹዋ ሻካናዉ ኑዉ ደእያ ሀደታን ጨቀቲቶ።

3-4 ሄዋ ጸላላ ግደና፤ ኑን ኑ ዋይያንካ ናሽቲቶ፤ አያዉ ጎፕ፣ ዋይያፕ ዳንዳያይ፣ ቃይ ዳንዳያፕ ፓጮያን ምንያዌ፣ ፓጮያን ምኖታፕ ሀደታይ ይያዋ ኑን ኤሬቶ።

5 ጸሳይ ኑዉ እሜዳ ጌሻ አያና ባጋና ባረ ሲቁዋ ኑ ዎዛናን ጉሴዳ ድራዉ፣ ሄ ኑን ደማናዉ ናሽቻን ናግ ኡቲዳዌ ኑና ዩላየና።

6 አያዉ ጎፕ፣ ኑን ብሮ ዎልቃይ ባይናዋንታ ግዲደ ደእሸን፣ ጸሳይ ዶሬዳ ዎዲ ጋክና፣ ክርስቶስ ናጋራንቻቲዋ ድራዉ ሀይቁዳ።

7 ጽሎ ኡራ ድራዉ፣ እት ኡራይ ሀይቃናዌ ዳሮ መቶባ፤ ሸን ሎኦ አሳ ድራዉ ሀይቃናዉ፣ “ኤኖ” ግያ ኡራይ ኑን ኤር ቤተናን አገና።

8 ሸን ኑን ብሮ ናጋራንቻ ግዲደ ደእሸን፣ ክርስቶስ ኑ ድራዉ ሀይቁዳ፤ ሄዌ ጸሳይ ኑና አይ ኬና ሲቅንቶን ኦ ሲቁዋ ኤርሴ።

9 ሰም ኑን ሀእ ኦ ሱላን ጽሎዳዋ ግደፕ፣ ኦ ባጋና ጸሳ ሀንቁዋፕ አታና።

10 አያዉ ጎፕ፣ ኑን ጸሳና ካስ ሞርከ፤ ሸን ኦ ናኦ ሀይቁዋን አናና ሰገቲዶ። ሄዋፕ አሊደ፣ ሀእ ኑን ጸሳና ሰገቲዳዋፕ ጉይያን፣ ኦ ፓጻ ግድያ ድራዉ ኑና አሻና።

11 ሸን ሄዋ ጸላላ ግደና፤ ሀእ ኑና ጸሳና ሰገጮዳ ኑ ጎዳ የሱሰ ክርስቶሳ ባጋና ኑና ጸሳባይ ናሽቲ።

ሀይቁ አዳማን ዪና፣ ደኡ ክርስቶሳን ዬዳ

12 ሄዋ ድራው፣ ናጋራይ ሀ ሳኦ እት አሳ ባጋና ገሌዳ፤ ሄ ናጋራይ ባረናና ሀይቁዋ አሄዳ፤ ሄዋ ጋሱዋን፣ አሳይ ኡባይ አዳማ ባጋና ናጋራ ኦሌዳ ድራው፣ ሀይቁ አሳ ዛርያ ኡባ ጋኬዳ።

13 ሀጊ እመታናፕ ካሰ፣ ሀ አላምያን ናጋራይ ደኤ፤ ሸን ሀጊ ባይና ዋደ ናጋራይ ፓይደተና።

14 ሸን አዳማ ዋድያፕ፣ ሙሴ ዋድያ ጋካናው፣ ሀይቁ አሳ ኡባ ሞዴዳ፤ ሀራይ አቶ አዳም ጸሳ ሀገጧ አዛዘተናን እጹዳዋዳን፣ ናጋራ ኦሌናፍዋንታካ ሀይቁ ሞዴዳ።

አያው ጎፕ፣ አዳም ያናዋ ለምሱዋ።

15 ሸን ጸሳ እሞታይ አዳማ ናጋራ ኬና ግደና ድራው፣ ኡንቱንቱ እት ማላ ግድክኖ፤ እት ብታንያ ናጋራ ድራው፣ ጮራ አሳይ ሀይቁዳዌ ቱማ፤ ሸን ጸሳ አጵ ኬካተላይነ አ እሞታይ እት አሳ አጵ ኬካተላ ባጋና፣ የሱስ ክርስቶሳ አጵ ኬካተላ ባጋና ጮራ አሳው ዳሬዳ።

16 ጸሳ እሞታይ ናጋራ ኦሌዳ ብታንያ ባጋና ዬዳዋ ማላ ግደና፤ አያው ጎፕ፣ አዳም እት ናጋራ ኦሌዳዋፕ ጉይያን፣ ጸሳይ አ ባይዜዳዋዳን ፕርዴዳ፤ ሸን አሳይ ዳር ናጋራ ኦሌዳዋፕ ጉይያን ጸሳይ፣ “ሀንተንቱ ባይዘበይክታ” ጊደ፣ ባረ አጵ ኬካተላ ኡንቱንታ በሴ።

17 አያው ጎፕ፣ እት ብታንያ ናጋራ ጋሱዋን፣ አ ናጋራ ባጋና፣ ሀይቁ ካውቲዳዌ ቱማ፤ ሸን እት ኡራይ፣ የሱስ ክርስቶስ ኦሌዳባይ አይ ኬና ዳሬ፤ ጸሳ ዳር አጵ ኬካተላነ ጽሎተላ እሞታ አክያ ኡባይ ክርስቶሳ ባጋና ጸኒደ ደአና።

18 ሰም እት ኡራይ ናጋራ ኦሌዳ ጋሱዋን አሳ ኡባ ቦላ ባይዜዳዋዳን ፕርዳይ ዬዳ። ሄዋዳንካ እት ኡራይ ጽሎባ ኦሌዳ ጋሱዋን፣ ጸሳይ አሳ ኡባ፣ “ባይዘበይክታ” ጊደ ኡንቱንቶ ደኡዋ እሜዳ።

19 አያው ጎፕ፣ እት ኡራይ አዛዘተናን እጹዳ ጋሱዋን፣ ዳር አሳይ ናጋራንቻ ግዴዳ፣ ሀዋዳንካ ቃይ እቱ ኤኖ ጌዳዋን ጮራ አሳይ ጽላና።

20 ናጋራ ዳርሳናው፣ ሀጊ ዬዳ፤ ሸን ናጋራይ ዳርያ ዋደ ጸሳ አጵ ኬካተላይ ሎይሐ ዳሬዳ።

21 ናጋራይ ሀይቁዋ ዋልቃን ካውቲዳዋዳን፣ ሀዋዳንካ ቃይ ጸሳ አጵ ኬካተላይ ጽሎተላ ዋልቃን ካውቲደ፣ ኑ ጎዳ የሱስ ክርስቶሳ ባጋና፣ ኑና መድና ደኦ ካለሌ።

6

ናጋራፕ ሻክቲደ ክርስቶስን ደኡሳ

1 ያትና፣ ኑን ዋጋኔ? ጸሳ አቶ ኬካተላይ ዳራናዳን፣ ናጋራን ምኒደ ደእኔ?

2 ግደና፤ ኑን ናጋራ ኦብና ማላ ሀይቂድጌዶ። ያትና፣ ኑን ሀዋፕ ሰንላዉ ዋት አ ግደን ደእኔ?

3 ዋይ ኑን ኡባቱ ክርስቶስ የሱሳና እትፕ ግዳናዉ፣ ጸማቀቲዳ ዋደ፣ አ ሀይቂዋንካ አናና እትፕ ግዳናዉ ጸማቀቲዳዋ ኤርክቲ?

4 ሄዋ ድራዉ፣ ክርስቶስ ባረ አዉዋ ቦንቾ ዋልቃን ሀይቂዋፕ ደንዶዋዳን፣ ኑንካ ኦራላ ደኡዋ ደአናዉ፣ አ ሀይቂዋ አናና ሻካናዉ ጽንቃታን አናና እትፕ ሞገቲዶ።

5 እያዉ ጎፕ፣ ኑን አ ሀይቂዳዋዳን ሀይቂደ፣ አናና እቱዋ ግደፕ፣ ሀዋዳንካ፣ ሀይቂዋፕ አ ደንዶዋዳን ኑንካ ደንዲደ፣ አናና እቱዋ ግዳና።

6 ኑን ሀዋፕ ሰንላዉ ናጋራዉ አይለ ግደና ማላ፣ ቃይ ኑ ናጋራንቻ አሳተላ ዋልቃይ ጳያና ማላ፣ ኑ ኤጫ አሳተላ ክርስቶስና ማስቃልያ ቦላ ምስማርያን ጽሽት ካቀቲዳዋ ኤሬቶ።

7 እያዉ ጎፕ፣ እት ኡራይ ሀይቂያ ዋደ ናጋራ ዋልቃይ አ ሞደና፤ ሸን

8 ኑን ክርስቶስና ሀይቂዳዋ ግደፕ፣ አናና ቃይ ደአናዋ አማኔቶ።

9 እያዉ ጎፕ፣ ክርስቶስ ሀይቂዋፕ ደንዴዳዋ፣ ቃይ ላኤንሉዋ አ ሀይቀናዋን ሀይቂ ሰንላፕ አ ሞደናዋ ኑን ኤሬቶ።

10 አ እት ካላካ ሀይቂዳ፤ ናጋራዉ አ ቦላ ዋልቃይ ባዋ፤ ሸን አ ሀ ደእያ ደኡዋ ጸሳዉ ደኤ።

11 ሀዋዳን ቃይ ህንተ ናጋራ ኦብናዳን፣ ህንተንታ ሀይቂዳዋዳን ቆፕተ፤ ሸን ጎዳ ክርስቶስ የሱሳ ባጋና ጸሳዉ ህንተ ፓጻ ደእያዋዳን፣ ህንተንታ ቆፕተ።

12 ሄዋ ድራዉ፣ ህንተ ህንተንቱ አሳተላ አዋ አዛዘታና ማላ፣ ናጋራይ ሀይቂያ ህንተ አሳተላ ሞዶ።

13 ቃይ ህንተ አሳተላፕ እት ሳነ ኢታ ኦሱዋ ኦላናዉ ናጋራዉ አዋፕተ፤ ሸን ሀይቂዋፕ ደንዴዳ አሳዳን ህንተንታ ጸሳዉ አዋተ፤ ቃይ ህንተ ኩሙንላ አሳተላካ ጽሎ ኦሱዋ ኦላናዉ ጸሳዉ አዋተ፤

14 እያዉ ጎፕ፣ ናጋራይ ህንተንታ ሞዳናዉ ዳንዳየና፤ ህንተ ጸሳ አቶ ኬካተላ ጋርሳና ደኢታፕ አትን፣ ሀግያፕ ጋርሳና ደእክታ።

ጽሎተላዉ አይለ ግድያዋ

15 ያትና፣ ዋናኔ? ጸሳ አጽ ኬካተላ ጋርሳና ደኢናፕ አትን፣ ህግያፕ ጋርሳና ደኢና ድራው፣ ናጋራ ኦላኔ? ግደና፤

16 ህንተ ህንተንታ እት ኡራው አዛዘታናው፣ አይልያዳን አሊደ እምያ ዋደ፣ ሄ ህንተንታ አዛዘያዎ አይለቱዎ ግድያዎ ኤሪታ፤ ዋይ ህንተ ህንተንቶ ሀይቁዎ አህያ ናጋራው ኤኖ ጊታ፤ ዋይ ህንተ ህንተንታ ጽሎ አልያ አዛዘ ኤኖ ጊታ።

17 ሸን ጸሳው ጋላታይ ግደ፤ አያው ሳፕ፣ ናጋራው ካሰ ህንተ አይለ፤ ሸን ጉየፕ ህንተ አኬዳ ትምርትያ ግደን ደእያ ቱማተላው ህንተ ኩመንላ ዋዛናፕ አዛዘቱድታ።

18 ህንተንቱ ናጋራ አይለተላፕ ከሲደ፣ ጽሎተላው አይለ ግዴድታ።

19 ህንተንቱ መጠታን ዳቡራንቻ ግድያ ድራው፣ ታን አሰካ ገልያ ሃሳያ ሃሳያይ፤ ህንተ ካሰ ህንተ ኩመንላ አሳተላ ናቁዎ አላናው፣ ቱናተላውን ናቆ አይለ አሊደ እሜድታ፤ ሀእ ሄዋዳንካ ህንተ ኩመንላ አሳተላ ጌሻባ አላናው፣ ጽሎተላው አይለ አሊደ እምተ።

20 ህንተንቱ ናጋራው አይለቲደ ደእያ ዋደ፣ ጽሎተላይ ህንተንቶ ጎዳ ግደና።

21 ህንተንታ ሀእ ዬላይያ የዋቱዎ ሄ ዋደ ኦሌዳዋፕ አይ ማዲዎ ደሜድቱ? አያው ሳፕ፣ ሄ የዋቱዎ ወርሰላይ ሀይቁዎ።

22 ሸን ናጋራ አይለተላፕ ህንተ ከሲደ፣ ጸሳው ኤኖ ጌድታ፤ ቃይ ህንተ አልያ ኡባባን ህንተንታ ኡባካ አው አሊደ እሜድታ። ሄዌ ህንተንቶ ዋር፤ ሄዋ ወርሰላይ መጅና ደኡዎ።

23 አያው ሳፕ፣ ናጋራ ጋቲ ሀይቁዎ። ሸን ጸሳይ ኑ ጎዳ ክርሰቶሳ የሱሳ ባጋና እምያ እምታይ መጅና ደኡዎ።

7

ሙሴ ህግያ ቃሹዋፕ ብለትያዎ

1 ታናዳን አማንያዋንቶ፣ ህንተንቱ ኡባይ ህግያ ኤርያ ድራው፣ ታን ግያዎ ሎይላ ኤሪታ፤ ሀጊ እት አሳይ ፓጻ ደኤዳ ዋደ ጸላላን አ ዋዴ።

2 አያው ሳፕ፣ አሰና ገሌዳ ሞሽራታ እዝ አሰናይ ፓጻ ደኤዳ ከናን፣ ህግያን አናና ቃሸታ ኡታዲ፤ ሸን እዝ አሰናይ ሀይቆፕ፣ አናና ጫቁዳ ሀጊ እዝ ዋደና።

3 ሄዋ ድራው፣ እዝ ባረ አሰናይ ፓጻ ደእሸን፣ ሀራ አቱማዎ ገሎፕ፣ አሳይ እዘ፣ “ዋሹመወኖ” ጋና። ሸን እዝ አሰናይ

ሀይቆፕ፡ ህጊ እዞ ሞደና፤ እዛ ሀራ አሰና ገሎፕነ እዞ ኦንነ፡ “ዋሹመዉና” ጌና።

4 ታናዳን አማንያዋንቶ፡ ሄዋዳን ህንተንቱ ቃይ ክርሰቶሳ አሳተሳፕ እት ባጋ ግድያ ድራዉ፡ ህንተንቱ አ ባጋና ሀይቁድታ። ቃይ ኦን ጸሳ ማድያ ኦሱዋ ኦላና ማላ፡ ህንተንቱ ጸሳይ ሀይቁዋፕ ደንሌዳ ክርሰቶሳዋንታ።

5 እያዉ ጎፕ፡ ኦን ኦ አሳተሳይ ኮዬዳዋዳን ደእያ ዎደ፡ ህጊ ኦን ናጋራ ኦላናዳን፡ ኦና ደን፳፳፤ ኦ አሳተሳ ግድን ኢታ አሙ ደእያ ድራዉ፡ ኦን ሀይቆ አይፍያ አይፊደ።

6 ሸን ሀእ ኦን ኦና ቃቹዳዎ ሀይቁዳ ድራዉ፡ ጸሳይ ኦና ህግያ ቃሹዋፕ ብሌዳ። ሄዎ ድራዉ፡ ኦን ጌሻ አያናይ ገግሴዳ ኦራላ ኦግያን ጸሳዉ ኤኖ ጋናዋፕ አትን፡ ጸፈቱዳ ህጊ ኦዉ ገግሴዳ ኤጫ ኦግያን ኤኖ ጎኩ።

ህግያነ ናጋራ

7 ያትና፡ ኦን ዋጋኔ? ህጊ ባረ ሁጳዉ ናጋሬ? ሄዎ ግደና፤ ሸን ህጊ ናጋራይ አየንቶ ታና ኤርሴዳ። እያዉ ጎፕ፡ ታን ህጊ፡ “አሳባ አሞቶፓ” ግቤነንቶ፡ አሳባ አሞትያዌ አየንቶ ኤርከ።

8 ሸን ናጋራይ ታን ኡባባ አሞታና ማላ፡ አዛዙዋ ባጋና ታ ቦላ ኦግያ ደሜዳ፤ እያዉ ጎፕ፡ ህጊ ባዌንቶ፡ ናጋራዉ ዎልቃይ ባዎ።

9 ካሰ ህጊ ባይና ዎደ ታን ፓጸ፤ ሸን አዛዙ ዬዳ ዎደ ናጋራይ ደኦ ሰሞና፡

10 ታን ቃይ ሀይቃድ፤ ታና ፓጸ ዎላናዉ ጸሳይ ቆፔዳ አዛዙ፡ ታዉ ሀይቁዋ አሄዳ።

11 እያዉ ጎፕ፡ ናጋራይ አዛዙዋ ባጋና ታና ጭምያ ኦግያ ደሚደ፡ ሄ አዛዙዋን ታና ዎጴዳ።

12 ሄዎ ድራዉ፡ ህጊ ጌሻ፤ አዛዙካ ጌሻ፡ ጽላነ ሎእ።

13 ያትና፡ ሎኦባይ ታዉ ሀይቁዋ አሄዳ? ሄዎ ግደና፤ ሸን ታዉ ሄዎ ናጋራይ አሄዳ፤ አሳይ ናጋራይ አየንቶ ሻኪደ ኤራና ማላ፡ ናጋራይ ሎኦባ ባጋና፡ ታዉ ሀይቁዋ አሄዳ። ቃይ አዛዙ፡ “ኦንነ ናጋራ ኦላናዉ በሰና” ያግያ ድራዉ፡ ናጋራይ ካሰዋፕ አቋ ኢቱዳ።

አሳ ደኡዋ ጋርሳን ደእያ ባጽያ

14 ኦን ህጊ ጸሳዋ ግድያዎ ኤሬቶ፤ ሸን ታን ታና ናጋራዉ ዛልኤዳ ሀይቁያ አሳ፤

15 ታን ኦሎስ ምዛና አላክ፤ አያው ጎጥ፣ ታን እጽያዎ ኦላይፕ አትን፣ ታን ኦላናው ደሰያዎ ኦላክ።

16 ታን እጽያዎ ኦሎስ ግደጥ፣ ህጊ ሎኦ ግድያዎ ማርካታይ።

17 ሄዎ ግደጥ፣ ሄ የወዋ ታ ሶላ ደእያ ናጋራይ ኦሎስ ግደጥ አትን፣ ሀእ ታን ኦላክ።

18 ታናን፣ ሄወነ ታ አሳተላን ሎኦባይ ደኤናዎ ታን ኤራይ፤ አያው ጎጥ፣ ሎኦባ ኦሎስ አሙ ታ ሶላ ደኤጥካ፣ ታን ሄ ሎኦባ ኦላናው ደንዳይከ።

19 ታን እጽያ ኢታባ ኦላይፕ አትን፣ ታን ደሰያ ሎኦባ ኦላክ።

20 ሸን ታን እጽያዎ ኦሎስ ግደጥ፣ ሄዎ ታ ሶላ ደእያ ናጋራይ ኦሎስ ግደጥ አትን፣ ሀእ ሄዎ ኦሎስ ታና ግደከ።

21 ሰም ታን ሎኦባ ኦላናው ደሰሸን፣ ኢታባ ኦሎስ ታው ህገ ግድያዎ ደማድ።

22 አያው ጎጥ፣ ታን ታ ምዛና ግደን ጸሳ ህግያን ናሽታይ፤

23 ሸን ታ ሶላ ግደን ደእያ ታ ምዛና ቆፋ ህግያና ዋግትያ ዲማ ህግያ በእይ። ሄ ህጊ ታ ሶላ ግደን ደእያ ናጋራ ኦሰሰያ ህግያን ታና ቃሽሴ።

24 ታን አይባ ናሽቶ ባይና አሴ! ታና ሀይቆ አፍያ ሀ አሳተላፕ አሻናዌ ኦኔ?

25 ኑ ጎዳ የሱሰ ክርሰቶሳ ባጋና ጸሳው ጋላታይ ግድ።

ሰም ታን ታ ምዛና ቆፋን ጸሳ ህገው ኤኖ ጋይ። ሸን ታ አሳተላን ታና ናጋራ ኦሰሰያ ህገው ኤኖ ጋይ።

8

ጌሻ አያናይ ኮይያዎዳን ደኡሳ

1 ሄዎ ድራው፣ ክርሰቶሳ የሱሳና ደእያዎንቱ ሶላን ፕርዳይ ሀእ ባዋ፤

2 አያው ጎጥ፣ ክርሰቶሳ የሱሳ ባጋና ኑው ደኡዎ እምያ ጌሻ አያና ህጊ ታና * ናጋራ ህግያ አይለተላፕን ሀይቁዎ ህግያ አይለተላፕ ከሴዳ።

3 አሳ አሳተላይ ዳቡራንቻ ግድያ ድራው፣ ህጊ ኦላናው ደንዳይቤናዎ ጸሳይ ኦሎዳ፤ ናጋራንቻቱዎ አሳተላ ማላ አሳተላና ደእያ ባረ ናኦ፣ አሳይ ኦሎዳ ናጋራው ያርሹዎ ግዳናው ጸሳይ ከቲደ፣ አሳ አሳተላ ግድን ደእያ ናጋራ ፕርዳዳ።

7:15 ጋላ. 5:17 * 8:2 ታና- እት እት ጌሻ ቃላ ብለላይ፣ ኔና ዎይ ህንተንታ ያገ፤ ሀራይ ቃይ ኑና ያገ።

4 ጌሻ አያናይ ኮይያዋዳን ደእያዋንቱ፣ ኩ አሳተላይ ኮይያዋዳን ደአናዋንቱ ቦላ፡ ኩ ቦላ፡ ህግያ ጽሎ አዘዙ ፖለታና ማላ፡ ጸሳይ ሀዋ ኦሌዳ።

5 ባረንቱ አሳተላይ ኮይያዋዳን ደእያዋንቱ ባረንቱ አሳተላባ ቆፒና፤ ሽን ጌሻ አያናይ ኮይያዋዳን ደእያዋንቱ ጌሻ አያናባ ቆፒና።

6 አሳተላባ ቆፋሳይ ሀይቁዋ አሄ፤ ሽን ጌሻ አያናባ ቆፋሳይ ደኡዋን ሳርተላ አሄ።

7 አሳተላባ ቆፋሳይ ጸሳው እጾ፤ አያው ጎፒ፡ አሳተላይ ጸሳ ሀገው ኤኖ ጌና፤ ቃይ ኤኖ ጋናውካ አው ዳንዳየተና።

8 ባረንቱ አሳተላው ኤኖ ግያዋንቱ ጸሳ ናሽቻናው ዳንዳይክና።

9 ሽን ጸሳ አያናይ ህንተንቱን ደኦ፡ ጌሻ አያናይ ግያዋዳን ደኢታ፡ አትን፡ ህንተ አሳተላይ ኮይያዋዳን ደእክታ። ሽን ኦንነ ክርሰቶሳ አያናይ ባይናዋ ግድ፡ ሄ ኡራይ ክርሰቶሳዋ ግድና።

10 ሽን ክርሰቶሰ ህንተንቱን ደኦ፡ ህንተ አሳተላይ ናጋራ ጋሱዋን ሀይቁዳዋ፤ ሽን ህንተ አያናይ ጽሎተላ ጋሱዋን ህንተንቱን ፓጻ ደኤ።

11 ሽን የሱሳ ሀይቁዋ፣ ደንጮዳ ጸሳ አያናይ ህንተ ግድን ደኦ፡ ሀይቁዋ፣ ክርሰቶሳ ደንጮዳ ጸሳይ ቃይ ህንተንቱን ደእያ ባረ ጌሻ አያናን፡ ሀይቁያ ህንተ አሳተላውካ ደኡዋ እማና።

12 ሰም ታናዳን አማንያዋንቶ፡ ኩን አጩዋና ደኤቶ፤ ኩ አሳተላይ ኮይያዋዳን ደአናው ኑው በሰና።

13 አያው ጎፒ፡ ህንተ ህንተ አሳተላይ ግያዋዳን ደኦ፡ ህንተ ሀይቃና፤ ሽን ህንተ ህንተ ናጋራ ኦሱዋ ጌሻ አያናን ዋጾ፡ ፓጻ ደኤና።

14 ጸሳ አያናይ ካለልያ ኡባቱ ጸሳ ናና።

15 አያው ጎፒ፡ ኩን ኩ ጌሻ ጾቁ ኦሌዳ፡ “አባ! ታ አቦ” ያጊደ ጾሰያ፡ ኩና ጸሳ ናና ከሰያ ጌሻ አያና ጸሳ፣ አኬድ፣ አትን፡ ላኤንጱዋ ያናናው አይለ ከሰያ አያና አክበይኩ።

16 ጸሳ አያናይ ባረ ሁጳው ኩ አያናና ግዲዳ፡ ኩን ጸሳ ናና ግድያዋ ማርካቱ።

17 ኩን አ ናና ግድ፡ እ ባረ አሳው ምንጄዳ እንጄዋ ላታና፤ ቃይ ኩን ጸሳይ ክርሰቶሳው ምንጄዳዋካ አናና ላታና፤ ኩን ክርሰቶሳ ዋይያ አናና ሻኩ፡ አ ቦንቹዋካ አናና ሻካና።

ጸሳ ናናው ቆንጫናው ደእያ ቦንቹዋ

18 አያው ጎፒ፡ ኩን ሀእ ዋየትያ ዋይያ ኑው ሰንላ፣ ቆንጫና ቦንቹዋና ጋላናው፡ ኡባካ ዳንዳየተና ጋደ ታን ቆፓይ።

19 ጸሳይ መጭዳ መጠታ ኡባይ ጸሳ ናናይ ቆንጫናዋ ሎይሉ ላሞት ኡቲዳ።

20 እያዉ ሳጥ፡ መጠታ ኡባይ ማዲ ባይናባ ግዳናዳን፡ ጸሳይ ከ ቦላ ፕርዴዳ፤ ሰንሳጥ ደማና ጊደ ናሽቻን ናግ ኡታናዳን ኦፊዳ ጸሳይ ኮዬዳ ድራዉ ሀኔዳጥ አትን፡ መጠታ ኡባይ ባረ ሀጸዉ ኮዬዳዋን ግደና።

21 መጠታ ኡባይ ባረ ሀጸዉ ባሻ አይለተሳጥ እት ጋላሰ ከሳናዋ፤ ቃይ ሄ መጠታቱ ጸሳ ናናይ አይለተሳጥ ከሴዳ ቦንቾ ከሳ ሻካና።

22 እያዉ ሳጥ፡ መጠታ ኡባይ እትጥ ሀዋ ጋካናዉ፡ ማጫ አሳ የሉ አይቁና ኦልያዋዳን፡ ሳኩዋን ኦልያዋ ኩን ኤሬቶ።

23 ቃይ ሄዋ ጸላላ ግደና፤ ኩን፡ ጌሻ አያና ጸሳ ባይራ እሞታዳን ኦሊደ አኬዳዋንቱ፡ ኩ ሀጸዉ ጸሳይ ኩና ባረ ናና ኦላናዳን ኩ ኩመንሳ አሳተሳ ዋዛናዳን ናጊደ፡ ኩ ግደን ኦሊቶ።

24 እያዉ ሳጥ፡ ኩን ጸሳይ እማና ጌዳዋን አቲደ። ሽን ኩን ጸሳይ እማና ጌዳዋ በአጥ፡ ያትና፡ ሄዌ ናሽቻን ናግያዋ ግደና፤ እያዉ ሳጥ፡ ባረ በእያዋ ደማና ጊደ፡ ናሽቻን ናግያዌ ኦኔ?

25 ሽን ኩን በኤናዋ ደማና ጊደ፡ ናሽቻን ናሳጥ፡ ሄዋ ዳንዳደደ ናጌቶ።

26 ሀዋዳን ቃይ ጌሻ አያናይ ኩ ዳቡራ ማዳናዉ ዬ፤ እያዉ ሳጥ፡ ኩን ጸሳ ዋት ዋሳናዉ በሰንቶ ኤርኮ፤ ሽን ጌሻ አያናይ ባረ ሀጸዉ ቃላን ቆንጭሳናዉ ዳንዳየተና ኦልያን ኩዉ ጋናቲ።

27 ቃይ አሳ ዋዛና ብድያ ጸሳይ፡ ጌሻ አያናይ እ ኮይያዋዳን፡ ጸሳ ናቶ ጋናትያ ድራዉ፡ ጌሻ አያና ቆፋይ እየንቶ ኤሬ።

28 ጸሳይ ባረና ሲቅያዋንቶ፡ ባረ ቆፋዳን ዴሴዳዋንቶ፡ ኡባ የዉዋ ሎኦተሳዉ ኦልያዋ ኩን ኤሬቶ።

29 ጸሳይ ባረ ናኦይ ጮራ እሻቱዋ ግደን ባይራ ግዳናዳን፡ እ ካሰ ኤሬዳዋንታ ቃይ ባረ ናኦ ማላታናዳን፡ ካሰቲደ ቆፋ ቃቼዳ።

30 ጸሳይ ካሰቲደ ቆጤዳዋንታ፡ ኡንቱንታ ቃይ ዴሴዳ፤ ሄ ዴሴዳዋንታካ ጌሼዳ፤ ሄ ጌሼዳዋንታካ ቃይ ቦንቼዳ።

ጸሳ ሲቁዋ

31 ያትና፡ ኩን ሀዋ ኡባ ዋጋኔ? ጸሳይ ኩ ባጋ ግደጥ፡ ኩና ኦን ኤቀታናዌ?

32 እ ሀራይ አቶ ባረ ናኦካ ዋይያጥ ጉየ አሽቤና፤ ሽን እ ኩዉ ኡባዉ አሊደ እሞ አኔዳ። እ ባረ ናኦ እሜዳዌ ቃይ ኩዉ ኡባባ ጮ እመኔ?

33 ጸሳይ ደሬዳዋንታ ኦኔ ሞታናዌ? ጸሳይ ባረ ሁጳው ኡንቱንታ ጽልሴዳ።

34 ያትና፣ ኡንቱንቱ ቦላ ፕርዳናው ዳንዳይያዌ ኦኔ? ሄዋ ጎፕ፣ ሀይቁዋፕ ደንዲደ፣ ጸሳፕ ኡሸቻ ባጋና ኡቴዳ፣ ክርሰቶሰ የሱሳ፤ እ ቃይ ኑው ጋናቴ።

35 ሰሞ ኑና ክርሰቶሳ ሲቁዋፕ ሻካናዌ ኦኔ? ዋዪ ዋይ መቱ ዋይ የደርሱ ዋይ ኮሻይ ዋይ ካሉ ዋይ ያሻይ ዋይ ኦላይ ኑና ሻካኔ?

36 ጸሳ ማጻፋይ፣ “ኑን ነ ድራው፣ ኡባ ጋላሰ ሀይቁቶ፤ ሹካው ኡፍያ ደርሳዳን ፓይደቴቶ” ያጌ።

37 ሸን ኑን ኑና ሲቁዳ ኡን ሀ የወዋ ኡባን ኑና ጸንያዋንቱፕ ኢዲቶ።

38-39 ኡያው ጎፕ፣ ሀይቁዋ ግድና፣ ደኡዋ፣ ኪታንቻቱዋ ግድና፣ ሞድያዋንታ፣ ሀእ ደእያዋንታ ግድና፣ ሰንሳፕ ያናዋ፣ ዋልቃማቱዋ ግድና፣ ቦላ ሳሉዋ ግድና፣ ጋርሳ ሳኦ፣ ኦይ መፍታ ግድናካ፣ ኑ ጎዳ ክርሰቶሳ የሱሳን ደእያ ጸሳ ሲቁዋፕ ኑና ሻካናው ዳንዳየናዋ ታን ኤራድ።

9

ጸሳይ ካሰ ደሬዳ እስራኤልያ አሳ

1 ታን ቱሙዋ ሃሳያይ፤ ታን ክርሰቶሳሳ፤ ቃይ ዋርዶትከ። ጌሻ ኡያናይ ሞድያ ታ ትላ ዋዛናይ ታን ዋርዶተናዋ ታው ማርካቴ።

2-3 ታው ኡሹዋን ዛረ ግድያ ታናዳን ኡማንያዋንቶ፣ ታ ዋዛናን ዳር ቃረታይን ኡገና ቆፋይ ደኤ። ኡያው ጎፕ፣ ታን ታ ሁጳው ኡንቱንቱ ድራው፣ ጸሳ ሸቃፕ ጋርሳና ደኡርክታሻ! ቃይ ክርሰቶሳፕካ ሻከታርክታሻ!

4 ኡንቱንቱ እስራኤልያ አሳቱዋ፤ ጸሳይ ኡንቱንታ ባረ ናና ኦሊደ፣ ባረ ቦንቹዋ ኡንቱንቱና ሻኬዳ። ኡንቱንቱና ቃላ ገሊደ፣ ሀግያ ኡንቱንቶ እማዳ። ኡንቱንቱ ጸሳው በሰያ ኡግያን ጎይኒኖ፤ ቃይ ጸሳይ እማና ጌዳዋካ ኡኬድኖ።

5 ኡንቱንቱ ዘረላን ካሰ ኡዋቱዋ ዛረ፤ ቃይ ክርሰቶሰካ ኡሹዋን ኡንቱንቱ ዛረ። እ፣ ኡባፕ ቦላ ግዲደ ሞድያ፣ መድናው ጋላተቱዳዌ ጸሳ። ኡመንእ።

6 ሸን ታን፣ “ጸሳይ እማና ጌዳዌ ኡታና” ያግከ። ኡያው ጎፕ፣ እስራኤልያ አሳ ኡባቱ ጸሳይ ደሬዳዋንታ ግድክኖ።

7 ቃይ ኡብራሃሙ ዘረፋቱ ኡባቱ ጸሳ ናና ግድክኖ። ጸሳይ ኡብራሃሞ፡ “ኣ ዘረፋይ ይሳቃ ባጋና ጸሰታናዎ” ያጌዳ።

8 ሄዋ ጉሳይ ኡንቱንቱ ጸሳይ እማና ጌዳ ኦግያን የለቲዳ ናናይ ዛርያዳን ፓይደታና፤ ሸን ኡሳ ቆፋዳን የለቲዳዎንቱ ጸሳ ናና ግድክኖ ጉሳ።

9 እያዉ ጎፕ፡ ጸሳይ እማና ጊደ ሃሳዬዳዌ ሀዋ፤ “ታን ሀ ጌተቲዳዎዳን ሄ ዎደ ያና፤ ሳራካ አቱማ ናኣ የላና” ያጌዳ።

10 ሄዋ ጸላላካ ግደና፤ እርቢቃ የሌዳ ማንተ ናና ኡዉ አቱዋ፤ እካ ኑ አዉዋ ይሳቃ።

11-12 ሸን እት ናኣ ዶራዳ ጸሳይ ባረ ሀጸዉ ቆፔዳዋ ግዳናዳን፡ ጸሳይ እርቢቅዉ፡ “ባይራይ ቲፋዉ አዛዘታና” ያጌዳ፤ እ ሄዋ ኡንቱንቱ የለታናፕን ኢታባ ዎይ ሎኦባ አይን ኦላናፕ ካሰና ጌዳ። ሄዋ ድራዉ፡ ጸሳ ዶራ እ ጸሴዳዎዳንፕ አትን፡ ኡንቱንቱ ኡሌዳዋና ግደና።

13 ጸሳ ማጸፋይ፡ “ያቆባ ሲቃድ፤ ሸን ኤሳ እጸድ” ያጌ።

14 ያትና፡ ኩን ዋጋኔ? ጸሳይ ደሸሲደ ፕርዲ? ሄዋ ግደና።

15 እያዉ ጎፕ፡ ሙሴዉ እ፡

“ታን ማራናዉ ኮይያዋንታ ማራና፤ ቃይ ቃረታናዉ ኮይያዋንቶካ ቃረታና” ያጌዳ።

16 ሰሞ ጸሳይ ኡሳ ማርያዌ እ ማራናዉ ኮይያ ድራሳፕ አትን፡ ኡሳይ ኮይያ ዎይ ኦላያ ድራሳ ግደና።

17 እያዉ ጎፕ፡ ጸሳ ማጸፋይ ግብጾ ካትያዉ፡ “ታን ታ ዎልቃ ኔናን በሳናዉን ታ ሱንላይ አላሞያ ኡባን ኦደታናዉ፡ ሄዋ ታን ኔና ካዉላድ” ያጌ።

18 ሰሞ ጸሳይ ማራና ኮይያዋ ማሬ፤ ቃይ ዎዛና ጎርዳና ኮይያዋ ዎዛና ጎርዳ።

ጸሳ ሀንቁዋን ማርታ

19 ሰሞ ሀንተ ታና፡ “ሄዌ ቱማ ግደፕ፡ ጸሳይ ኡሳ ባይዘ እያዉ ቶሺ? ጸሳይ ጌዳዋ እጸድ ጋናዌ ኦኔ?” ያጋናዉ ዳንዳዪታ።

20 ሸን ታ ላገዉ፡ ጸሳዉ ዛራናዉ ኔን ኦኔ? ኡርቃፕ ሙፍቲዳ ሚሻይ ጉየ ዛሪደ ባረና ሙጴዳዋ፡ “ታና ሀዋዳን እያዉ ሙጴዳ?” ጊደ ኦቻናዉ ዳንዳዪ?

9:7 ዶሞላ 21:12 9:9 ዶሞላ 18:10 9:11-12 ዶሞላ 25:33 9:15 ከሳ 33:19 9:17 ከሳ 9:16 9:20 ኢሳ. 29:16፤ 45:9

21 ዋይ ኡርቃ መድያዌ ባረ መድያ ኡርቃ ባረ ኮይያዋዳን ኦላናውን እት ማላ ኡርቃፕ እቱዋ ቦንቾ ሚሻ ኦሊደ፡ ቃይ እቱዋ ቶሽቲዳ ኦሱዋ ኦሳያ ሚሻ ኦሊደ መጻናው አው ማት ባዌ?

22 ጸሳይ ኦሌዳዌ ሀዋና እቱዋ። እ ባረ ሀንቁዋ በሳናውን ባረ ዋልቃ ኤርሳናው ኮዬዳ፤ እ ባረ ሀንቁዋን ፕርዳናዋንታ፡ ባይዛናው ጊግ ኡቲዳዋንታ፡ ዳሮ ገንጨዋን ዳንዳዬዳ።

23 ቃይ እ ማሬዳዋንቶ፡ ባረ ቦንቹዋ አካናው ጊግሰ ዋሌዳዋንቶ እ አይ ኬና ቦንቹትንቶን በሳናው ኮዬዳ።

24 ኑን እ ጸሴዳዋንታ፤ ሸን አይሁዳ አሳ ጸላላፕ ግደናን፡ አይሁዳ ግደና አሳ ግደፕካ ጸሴዳ።

25 ሆስአ ማጻፋን እ ግያዌ ሀዋ፤

“ታ አሳ ግደናዋንታ፡
‘ታ አሳ’ ጋደ ጸሳና።

ታን ሲቃቤና ዛርያካ፡
‘ታ ሲቃቶ’ ጋደ ጸሳና።

26 ‘ህንተንቱ ታ አሳ ግደክታ’ ግያዋ፡
ኡንቱንቱ ሰሴዳ ሄ ሳአን፡
ኡንቱንቱ፡ ‘ደኡዋ ጸሳ ናና’ ጌተቲደ ጸሰታናዋንታ”

ያጌ።

27 እሰያሰ እሰራኤልያ አሳባ ያጊደ ሃሳዬዳ፤
“እሰራኤልያ አሳይ አባ ማታን
ደእያ ሻፍያ ኬና ግደፕካ፡
ኡንቱንቱፕ አማሬዳዋንቱ ጸላላይ አታና።

28 አያው ጎፕ፡
ጎዳይ ሳኣ ቦላን ደእያ አሳ ኡባ ቦላ፡
ኤለካ ፕርዳና”

ያጌዳ።

29 እሰያሰ ካሰቲደ፡
“ኡባፕ ዋልቃማ ጎዳይ፡
ኑው አማሬዳ ዘርላ አሸነንቶ፡
ኑን፡ ሰደማ ካታማዳንነ፡
ጋሞራ ካታማዳን ሀኔደሸን”

ያግ ሃሳዬዳ።

30 ያትና፡ ኑን ዋጋኔ? ጽሎተላ ኮይቤና አይሁዳ ግደና አሳይ አማኑዋን ጽሌዳ፤

9:25 ሆሰ 2:23 9:26 ሆሰ 1:10 9:27 ኢሳ. 10:22-23 9:29 ኢሳ. 1:9

31 ሽን እስራኤልያ አሳይ ባረንታ ጽልስያ ሀግያ ኮዬዳዋንቱ ሄ ሀግያ ደምበይክኖ።

32-33 አያው ደምበይክኖ? ኡንቱንቱ ኦሱዋናፕ አትን፤ አማኑዋን ጽሎተላ ኮይቤና ድራሳ። ኡንቱንቱ ጸሳ ማጻፋይ፤

“አኬክተ፤ ታን ጽዮነን አሳ ጱቢያ ሹቻ፤

ኡንቱንቱ ኦግያን ዛላ ዋላና።

ሽን አን አማንያ ኦንነ ዬላተና”

ያገደ ጸፈቶዋዳን ጱቢያ ሹቻን ጱበቱድኖ።

10

እስራኤልያ አሳይ ጸሳ ኦግያ ካልቤና

1 ታናዳን አማንያዋንቶ፤ ታን እስራኤልያ አሳው ታ ኩመንላ ዋዛናፕ አሞትያዌን ጸሳ ዋሰያዌ ኡንቱንቱ አታናሳ፤

2 አያው ጎፕ፤ ኡንቱንቱ ጸሳው ኦላናው ሎይላ ኮይያዋ ታን ማርካታይ፤ ሽን ኡንቱንቱ ጸሳው ኦላናው ሎይላ ኮይያ ኮሻይ ቱሙ ኤራተላፕ ግደና።

3 አያው ጎፕ፤ ጸሳይ አሳ ጽልስያ ኦግያ ኡንቱንቱ ኤረናን፤ ባረንቱ ሁጳ ጽሎተላ ኤሳናው ኮዬድኖ፤ ቃይ ባረንቱ ሁጳው ጸሳይ አሳ ጽልስያ አገው ኤኖ ግበይክኖ።

4 አያው ጎፕ፤ አማኔዳ ኡባይ ጽላናዳን፤ ክርስቶስ ሀግያ ቆፋ ፖሌዳ።

አቶተላይ ኡባሳ

5 አሳይ ሀገው አዛዘቲደ ጽልያባው ሙሴ፤ “ሀጊ አዛዝያዋ አልያ ኦንነ ሄ ሀግያን ፓጸ ደአና” ያግ ጸፌዳ፤

6 ሽን አማኑዋን ጽልያባው ጌተቱዳዌ ሀዋ፤ “ነ ዋዛናን፤ ሉን ሳሉዋ ፑደ ባኔ?” ጎፕ። ሄዌ ክርስቶሳ ዲገ ዋላናሳ፤

7 ዋይ “ዲገ ሳኦ ጋርሳ ዋላናዌ ኦኔ?” ጎፕ። ሄዌ ክርስቶሳ ሀይቁዋፕ ደንላናሳ።

8 ሽን አ ግያዌ ሀዋ፤ “ጸሳ ቃላይ ነ ማታና፤ ነ ዶናን ነ ዋዛናን ደኤ” ጌተቱዳ” ያጌ። ሄዌካ ኦን ሀንተንቶ ኦድያ አማኑዋ ቃላ።

9 ኔን፤ “የሱስ ጎዳ” ጋደ ነ ዶናን ማርካቶፕ፤ ቃይ ጸሳይ ሀይቁዋፕ አ ደንሌዳዋ ነ ዋዛናን አማኖፕ፤ ኔን አታና።

10 አያው ጎፕ፤ አሳይ ባረ ዋዛናን አማኒደ ጽሌ፤ ባረ ዶናንካ ማርካቲደ አቱ።

11 ጸሳ ማጻፋይ፤ “አን አማንያ ኦንነ ዬላተና” ያጌ።

9:32-33 እ.ሳ. 28:16 10:5 ዋጋ 18:5 10:6 ዛረ. 30:12-14 10:11 እ.ሳ. 28:16

12 እይሁዳ አሳነ እይሁዳ ግደና አሳ ግደን ዲማተላይ ባዎ።
እት ጸሳይ ኡባ ጎዳ፤ እ ባረና ጸሰያ ኡባቶ ዳሮ ኬካ።

13 እያው ጎፕ፣ ጸሳ ማጸፋይ፣ “ጎዳ ሱንላ ጸሰያ ኦንነ አታና” ያጌ።

14 ያትና፣ ኡንቱንቱ አ አማንቤናዋንታ ግደፕ፣ ዎት አ ጸሳናው ዳንዳዪኖ? ቃይ ቃላ ሰሰቤናዋንቱ ዋን አማናናው ዳንዳዪኖ? ቃላ ኦድያዌ ቆፑፕ፣ ኡንቱንቱ ዋን ሰሳናው ዳንዳዪኖ?

15 ቃይ ቃላ ኦድያዋንቱ ኪተተናን አጎፕ፣ አሱ ዎት ኦደታናው ዳንዳዪኖ? እያው ጎፕ፣ ጸሳ ማጸፋይ፣ “ናሽቶያ ሞሽራቹዎ ኦድያዋንቱ ዩሳይ ዎት ሎኢ!” ያጌ።

16 ሸን ኡንቱንቱ ኡባይ ዎንጋላው አዛዘትብይክኖ፤ እያው ጎፕ እሰያሰ፣ “ታ ጎዳው፣ ኑን ማርካቴዳዎ ኦን አማኔዴ?” ያጌዳ።

17 ሰሞ አሳይ ቃላ ሰሲደ አማኔ፤ ቃይ እት ኡራይ ክርሰቶሳ ቃላ፣ ኦድና ሰሴ።

18 ሸን ኡንቱንቱ ቃላ ሰሰቤናዌ ቱሜ ጋደ ታን ኦቻይ። ቱማ ኡንቱንቱ ሰሴድኖ፤ ጸሳ ማጸፋይ፣

“ኡንቱንቱ ሃሳያ ኮሻይ
ሳኣ ኡባን ላለቱዳ፤
ኡንቱንቱ ቃላይካ ሳኣ ጋጸ ጋኬዳ”

ያጌዳ።

19 ሸን እሰራኤልያ አሳቱ ኤርብይክኖዬ ጋደ ታን ኦቻይ። ሙሴ ካሰ፣

“ታን ሀንተንታ አሳ ግደና አሳቱዋን ሴልሳና፤
ቃይ ኤያ አሳቱዋን ታን ሀንተንታ ሀንቀሐሳና”

ያጌዳ።

20 ቃይ እሰያሰ ዳሮ ጸሊደ፣
“ታና ኮይቤናዋንቶ ቤታድ፤
ታና ኦቶቤናዋንቶካ ቆንጫድ”

ያጌ።

21 ሸን እሰራኤላቱዋባ እ ሃሳዪደ፣
“ጋላሳ ኡባ አዛዘተናዋንቶን
ታዋ እጽያዋንቶ ታ ኩሽያ ሞጫድ”

ያጌ።

10:13 እ.ቤ. 2:32 10:15 እ.ሳ. 52:7 10:16 እ.ሳ. 53:1 10:18 ማክ. 19:4 10:19 ዛረ. 32:21 10:20 እ.ሳ. 65:1 10:21 እ.ሳ. 65:2

11

ጸሳይ እስራኤልያ አሳ ወርሰ ኦልቤና

1 ያትና፡ ጸሳይ ባረ አሳ እጼደ ጋደ ኦቾ? ሄዋ ግደና፤ አያወ ጎጥ፡ ታን ታ ሁጳዉ እስራኤልያ አሳ፤ አብራሃመ ዛረ፤ ቢንያማ ያራ።

2 ጸሳይ ኮይሮ ዶሬዳ ባረ አሳቱዋ እጸና፤ ጸሳ ማጻፋይ፡ ኤላሳ ታርክያ ግደን፡ ኤላሰ እስራኤላቱዋ ጸሳ ሰንፋን ዋት ሞትንቶ፡ ሀንተ ኤሪታ።

3 “ሳዳዉ፡ ኡንቱንቱ ሄ ሱንፋን ናባቱዋ ዎጄድኖ፤ ነ ያርሽያ ሳካ ኮሌድኖ። ያትና፡ ታን ታ ጸላላይ አታድ። ቃይ ኡንቱንቱ ታናካ ዎጳናዉ ኮዪኖ” ያጌዳ።

4 ጸሳይ አዉ ዋግ ዛሬዴ? “ታን ኤቃ ባኣላዉ ጉልባትቤና ላፑ ሻእ አሳ ታዉ አሻድ” ያጌዳ።

5 ሀዋዳንካ ቃይ ሀ ዎድያን፡ ጸሳይ ባረ አጼ ኬካተፋን ዶሬዳ አማሬዳ አሳቱ ደኢኖ።

6 ሸን እ ባረ አጼ ኬካተፋን ዶሬዳፕ አትን፡ ኡንቱንቱ ኦሱዋን ኡንቱንታ ዶርቤና፤ ሄዌ ጳዮፕ፡ አ አጼ ኬካተፋይ ቱሙ አጼ ኬካተፋ ግደና።

7 ያትና፡ አዬ? እስራኤልያ አሳቱ ባረንቱ ኮይያዎ ደምባይክኖ፤ ሸን ጸሳይ ዶሬዳ አማሬዳዋንቱ ደሜድኖ። የኮንቱ ዎዛናይ ምኔዳ።

8 ሀዋዳንካ፡ ጸሳ ማጻፋይ፡
“ጸሳይ ኡንቱንቱ ባረንቱ አይፍያን በኤናዳን
ባረንቱ ሀይፋን ሰሰናዳን፡
ሀዋ ጋካናዉ ኡንቱንቶ፡
አዛላ አያና እሜዳ”

ያጌዳ።

9 ቃይ ዳዊተ ያጌዳ፤
“ኡንቱንቱ ምያ ጋይታይ ኡንቱንታ ጲርያዳን አይቆ፤
ኡንቱንታ ጉፋንሉ፤ ኡንቱንቶ ኩሽያ ሸር ጭጎ።

10 ኡንቱንቱ ጴለናዳን፡ ኡንቱንቱ አይፊ ጎዘቶ፤
ኡባ ዎደ ባረንቱ መቱዋን ቁኒደ ደኢኖ”
ያጌዳ።

11:3 1 ካታ. 19:10፣ 14 11:4 1 ካታ. 19:18 11:8 ዛረ. 29:4፤
ሊሳ. 29:10 11:9 ማዝ. 69:22-23

11 ያትና፡ አይሁዳቱ ጹብቴዳ ዎደ፡ ደንደናዳን ኩንዴድኖ? ሄዎ ግደና፤ ኡንቱንቱ ናጋራ ኦሌዳ ድራዉ፡ አቶተላይ ኡንቱንቱ አይሁዳ ግደና አሳቱዎ ቃናታናዳን፡ አይሁዳ ግደና አሳዉ ዬዳ።

12 ሸን አይሁዳቱ ናጋራ ኦሌዳ ድራዉ፡ አላመዉ ዳሮ አንጂ ዬዳ፤ ቃይ ኡንቱንቱ ኩንደላይካ አይሁዳ ግደና አሳዉ ዳሮ አንጂዎ አሄዳ። ያትና፡ አይሁዳቱ ኡባይ ጉጀትያ ዎደ፡ አንጂ ዎይሳ ኬና ዳራንዴሻ!

አይሁዳ ግደና አሳይ አታና አቶተላ

13 ሸን ታን ሀእ ሀንተንቶ፡ አይሁዳ ግደና አሳዉ ሃሳያይ፤ ታን አይሁዳ ግደና አሳዉ የሱሰ ኪቴዳዎ ግድያ ድራዉ፡ ታ ኦሱዎ ቦንቻና።

14 ታን ታ ዛረ ግድያ አሳቱዎ ቃናታንቻቱዎ አላጥ፡ ኦን ኤር ኡንቱንቱጥ አማራዳዎንታ አሸናን አግከ።

15 አያዉ ጎጥ፡ ጸሳይ ኡንቱንታ እጹዳ ዎደ፡ ሀ አላሚ ጸሳና ሰገቴዳ። ያትና ጸሳይ ኡንቱንታ ሺሽ አክያ ዎደ፡ ሀይቄዳዌ ደኡዎ ደማናጥ አትን፡ አይ ሀናኔ?

16 ኮይሮ አይፈ ባጋ ሙናቃይ አንጀቴዳዎ ግደጥ፡ ሙመ ሙናቃይካ ቃይ አንጀቴዳዎ ግዳና፤ እት ሞላ ጸጹ አንጀቴዳዎ ግደጥ፡ ሀይላይ ኡባይካ ቃይ አንጀቴዳዎ ግዳና።

17 ሸን ዎራን ደሌዳ ዎጋራ ሞላ ቃንካጥ እቱዎ እቱዎ ካራዳሳን፡ ኔና ዎራን ደሌዳ ዎጋራ ሞላ ማላ ሄ ዎጋራና ጋላ ቃቼዶ፤ ኔን ቃይ ዛይቲ ከሰያ ዎጋራ ሞላ ጸጹዎና እትጥ ደእ።

18 ሰሞ ኔን ሄ ካረት ዎጴዳ ቃንካቱዎ ቦላን ኦቶረታናዉ በሰና፤ ሸን ኔን ኦቶረትያዎ ግደጥካ፡ ጸጹ ኔና ቶኬጥ አትን፡ ኔን ጸጹዎ ቶከናዎ አኬካ።

19 ሄዎ ድራዉ ኔን፡ “ኤ፤ ሸን ቃንካቱ ታን ኡንቱንቱ ሳኣን ገላናዳን ካረቴድኖ” ያጋና።

20 ሄዌ ቱማ፤ ኡንቱንቱ አማንቤና ድራዉ፡ ካረቴድኖ፤ ኔን አማኔዳ ድራዉ፡ ሄ ሳኣን ኤቃዳ። ሸን ያያጥ አትን፡ ኦቶሮ ቆፋ ቆገጋ።

21 አያዉ ጎጥ፡ ጸሳይ መ□ታ ቃንካ ማላትያዎንቶ፡ አይሁዳቶ ቃረትቤናዎ ግደጥ፡ ነዉ ቃረትያዎ ማላቲ?

22 ሰሞ ጸሳ ኬካተላን ጸላተላ በእ። ኩንዴዳዎንቶ እ ጸላ፤ ሸን ኔን አ ኬካተላን ሞናደ ደኦጥ፡ እ ነዉ ኬካ፤ ሄዌ ጳዮጥ፡ ኔንካ ቃይ ቃንጸታና።

23 እይሁዳቱካ ቃይ አማኒናን እጽጋዎ አሳጥ። ጸሳይ ካሰ ኡንቱንቱ ደእያ ሳን ዛሪደ ዋላና፤ እያው ሳጥ። እ ኡንቱንታ ዛሪደ ዋላናው ዳንዳዬ።

24 እያው ሳጥ። ጸሳይ ህንተንታ ዋራን ደእያ ኮይሮ መጠታ ዋጋራ ሞላጥ ቃንጸደደ። ህንተንቱ መጠታን ዋራን ደሎዋንቱዳን ግደናን ጋደን ቶኬዳ ዋጋራ ሞላና ጋሐ ኦይጮዳዋ ግደጥ። ያትና። ሄ ካረት ዋጄዳ ኮይሮ መጠታ ቃንካቱዋ ዛረሊደ። ኡንቱንታ ኮይሮ መጠታን ደሌዳ ባረንቱ ዋጋራ ሞላና ጋሐ ቃቻናው። አ እዬ ጸናናዌ?

ጸሳ ማርታይ ኡባሳ

25 ታናዳን አማንያዎንቶ። ታን ህንተ ኤራናዳን ኮይያ ቱሙ ጹራ የው ደኤ፤ ሄዌ ህንተ ህንተንታ ህንተረካ። ኑን አጄዳ ኤራንቻ ያጊደ ቆፕያዋ ድጌ፤ እሰራኤልያ አሳጥ ባጋይ ሰሰናን እጹዳ፤ ሸን ሄ ሰሰናን እጽጋዌ እይሁዳ ግደና አሳ ኩመንሳ ፓይዱ ጸሳኮ ጋካናው ጋምእና።

26 ሀዋዳንካ። እሰራኤልያ አሳይ ኡባይ አታና፤ ጸሳ ማጻፋይ ሀዋዳን ያጌ፤

“አሸያዌ ጽዮን ጌተትያ ካታማጥ ዪደ።
ናጋራ ኡሱዋ ኡባ ያቆባ ዛርያጥ ድጋና።”

27 ታን ኡንቱንቱ ናጋራ አቶ ያግያ ዎደ።
“ኡንቱንቱና ገላና ቃላ ጫቄ ሀዋ”
ያጌ።

28 እይሁዳ ግደና አሳቶ። እይሁዳቱ ዎንጋላ ሞሽራቹዋ ባጋና ህንተ ድራው። ጸሳና ሞርከ፤ ሸን ጸሳ ዶሩዋ ባጋና አዎቱዋ ድራው። ኡንቱንቱ እ ሲቅያዎንታ።

29 እያው ሳጥ። ጸሳይ ባረ እሜዳዋ ጉየ አከና፤ ቃይ ባረ ጴሴዳዋ እጻድ ጌና።

30 እይሁዳ ግደናዎንቶ። ጸሳው ህንተ ካሰና አዛዘትብይክታ፤ ሸን እይሁዳቱ አዛዘተናን እጹዳ ድራው። ጸሳ ማርተላ ሀእ ህንተ አኬድታ።

31 ሀዋዳን። ህንተ አኬዳ ማርተላ ድራው። እይሁዳቱ ቃይ ጸሳ ማርተላ ሀእ አካናዳን። ጸሳው አዛዘተናን እጹድኖ።

32 እያው ሳጥ። ጸሳይ አሳ ኡባ ማራና ማላ። አሳይ ኡባይ አው አዛዘተናን እጽጋ ሀኖታን ቃቹዳ።

33 ጸሳ ዲረተላይ ወይሳ ኬና ዳሬ? ኦ ኦጵ ኤራተላይነ ኦ ኤራተላይ ወይሳ ኬና ጨሜ? ኦ ፕርዳ ኦዳናዌ ኦኔ? ኦ ባረ ኦሐያዎ ኦያዉ ኦሐንቶ፣ ኦኔ ኦኬክያዌ?

34 ሄዎ ጸሳ ማጸፋይ፣ “ሳዳ ዎዛና ኤርያዌ ኦኔ? ኦ ዘራናዉ ዳንዳይያዌ ኦኔ?

35 ዎይ ባረ ኩሽያ ዛራና ማላ፣ አዉ እትባ እሜዳዌ ደኢ?” ያጌ።

36 ኦያዉ ሳፕ፣ ኡባባ እ መዲዳ፤ ቃይ ኡባባይካ ኦ ማታንነ አዉነ ደኤ፤ ጸሳዉ መድናዉ ቦንቹ ግድ። አመንእ።

12

ጸሳዉ ኦላናዳን ኩን ዋሊደ ደአናዉ በሲ?

1 ሰም ታናዳን አማንያዎንቶ፣ ህንተ ህንተ ኦናተላ ጸሳ ናሽቶያ ደኢነ ጌሻ ያርሹዎ ኦሐደ፣ ጸሳዉ ሽሻናዳን፣ ታን ህንተንታ ጸሳ ማርተላን ዎሳይ፤ ጸሳዉ ህንተ ሳይናናዉ በሲያ ቱሙ ኦጊ ሄዎ።

2 ጸሳይ ህንተ ቆፋ ኡባና ዲማዪደ፣ ህንተንታ ላዎፕ አትን፣ ሀ አላምያ አሳ ማላቶፕ። ሄ ዎደ ህንተ፣ ጸሳ ሽኒ፣ ሎኦባይ፣ ኦ ናሽቶያባይነ ቃይ ፖሎ ግዴዳባይ አየንቶ ኤራንታ።

3 ጸሳይ ታዉ እሜዳ ኦጵ ኬካተላን ታን ህንተንቶ ኦዳይ። ህንተንቱ ቆፓናዉ በሲያዎፕ ኦሐደ፣ ኦቶሩዎን ቆፖፕ፣ ሄዎ አጊደ፣ ዎዛና ማላናን ቆፕ፣ ጸሳይ ህንተንቶ ሁጲያን ሁጲያን እሜዳ አማኑዎ ኬናን ህንተ ቦላ ፕርድተ።

4 ኦ እት ቦላ ግድን፣ ጮራ ቦላ ቆሞቱ ደኢና፤ ሄ ቆሞቱዎ ኡባዉካ ዲማ ዲማ ኦሱ ደኤ።

5 ሀዎዳን፣ ኩን ጮራ አሳ ግድፕካ፣ ክርሰቶሳ ባጋና እት አሳ። ቃይ ኩን እት አሳተላ ቆሞቱዎዳን፣ እቱ እቱዎና ኦይቀት ኡቲድ።

6 ጸሳይ ኩዉ እሜዳ ኦጵ ኬካተላን ዲማ ዲማ እሞታይ ደኤ። ኦ እሞታይ ናበተላ ግድፕ፣ ኩዉ ደኢያ አማኑዎ ኬና ኦዳናዉ በሲ።

7 ሀራቱዎ ማዲሳ ግድፕ፣ ሄ ኦሱዎን ምናናዉ በሲ፤ ታማርሱሳ ግድፕ፣ ሄ ታማርሱዎን ምናናዉ በሲ።

8 ሀራ አሳቱዎ ምንሱሳ ግድፕ፣ ሄ ኦሱዎን ምናናዉ በሲ። ባረ ሁጲዉ ደኢያባፕ ሀራቶ እምያ ኦንነ ዎዛናፕ እሞ። ማታይ ደኢያ ኡራይ ምንሰ ኦላናዉ በሲ፤ ሀራቶ ኬክያ ኡራይ ናሽቶን ኬካናዉ በሲ።

11:33 ኢሳ. 55:8 11:34 ኢሳ. 40:13 11:35 ኢዮባ 41:11 11:36 1 ቆር. 8:6

9 ህንተንቱ ሲቁ አሳ በሳናዉ ሲቀትያዎ ግዳናዉ በሰና። ኢታባ እጽተ፤ ሎኦባ ሞንሲደ ኦይቂተ።

10 እቱ እቱዋና እሻቱዋዳን ሲቀትተ፤ እቱ እቱዋ ቦንኛያዋን ናሸትተ።

11 ሞኒደ ኦሐተ፤ አዛሎፕተ፤ ህንተ ኩመንላ ዋዛናፕ ጎዳዉ ኦሐተ።*

12 ጸሳይ ህንተንቶ እማና ጌዳዋን ናሸትተ፤ ዋይያን ገንጭተ። ኡባ ዋደ ጸሳ ዋሰተ፤

13 ጸሳ አሳቱዋ ኮሽያባን ማድተ፤ እማላ ሞክተ።

14 ህንተንታ የደርሰያዋንታ አንጅተ፤ ኡንቱንታ አንጅተ፤ ሐትን፤ ሸቆፕተ።

15 ናሸትያዋንቱና ናሸትተ፤ ዬክያዋንቱናካ ዬክተ።

16 አሳ ኡባዉ እት ማላ ቆፋ ቆፕተ፤ ኦሐያባን ኡባን ህንተንታ ቶቺደ ደእተ፤ ቶ አትን፤ ኦቶረቶፕተ፤ ህንተንታ ህንተረካ እጾ ኤራንቻ ጊደ ቆፖፕተ።

17 ኦንነ ህንተንቶ ኢታባ ኦሐፕ፡ ሄ ኡራዉ ኢታባ ኦሐ ዛሮፕተ፤ አሳ ኡባዉ ሎኦባ ኦላናዉ ቆፕተ።

18 አሳ ኡባና ሳሮተላን ደአናዉ፡ ህንተ ባጋና፡ ህንተንቶ ዳንዳየቱዳባ ኡባ ኦሐተ።

19 ታናዳን አማንያዋንቶ፡ ህንተ ህንተ ሁጳዉ አሳዉ ሀሉዋ ከሶፕተ። ጸሳይ ሀሉዋ ከሳናዳን፡ አ ቦላ ኦልተ። አያዉ ጎፕ፡ ጸሳ ማጻፋይ፡

“ጎዳይ፡ ታን ሀሉዋ ከሳና፤

ታን ኩሽያ ጭጋና’ ጌ” ያጌ።

20 ሸን ጸሳ ማጻፋይ፡

“ነ ሞርኪ ኮሻቶፕ፡ ሞዛ።

ሳመቶፕ፡ ኡሻ።

አያዉ ጎፕ፡ ኔን ሄዋ ኦሐያዋን፡

አ ዳርሳ ዬላያሳ”

ያጌ።

21 ኢታባ ሎኦባን ጸናፕ ሐትን፡ ኢታባይ ኔና ጸኖፕ።

* 12:11 ኩመንላ ዋዛናፕ ጎዳዉ ኦሐተ፡ ጌሻ አያናን ካለሰተደ ከተትያዋንታ ግድተ። † 12:16 ህንተንታ ቶቺደ ደእተ፡ እሸከ ግድተ ጉሳ። 12:16 ለም. 3:7 12:19 ዛረ. 32:35 12:20 ለም. 25:21-22

13

ጋድያ አይሰያዋንቶ ኤኖ ጋናዉ በሴ

1 አሳይ ኡባይ ጋድያ አይሰያዋንቶ ኤኖ ጋናዉ በሴ፤ አያዉ ሳጥ፡ ጸሳይ ጌናን ደእሸን፡ ጋድያ አይሰያዋ ደእናዉ ዳንዳየና። ሀእ ደእያ አይሰያዋንቱካ ጸሳይ ዋጭዳዋንታ።

2 ሄዋ ድራዉ፡ ሀእ ደእያ አይሰያዋንታ እጽያ ኦንነ ጸሳ አዛዙዋ እጹ፤ ባረ ቦላ ፕርዳ አሄ።

3 አያዉ ሳጥ፡ አይሰያዋንቱ ኢታባ ኦልያዋንታ ያሻናዋጥ አትን፡ ሎኦባ ኦልያዋንታ ያሸክኖ። አይሰያዎ ያየናን አጋናዉ ኮያይ? ያቶጥ ሎኦባ ኦላ፤ እ ኔና ጋላታና።

4 አያዉ ሳጥ፡ እ ነዉ ሎኦባ ኦላናዉ፡ ጸሳዉ ቆማ። ሸን ኔን ኢታባ ኦላጥ፡ ኢታባ ኦጭዳዋ እ ሴርያ ድራዉ፡ አዉ ያያ፤ እ ጸሳ ቆማ። ቃይ ኢታባ ኦልያዋንቱ ቦላ ጸሳ ሀንቁዋ እ አሄ።

5 ሄዋ ድራዉ፡ ጋድያ አይሰያዋንቶ ኤኖ ግያዌ ጸሳ ሙራ ጸላላሳ ግደናን፡ ሀንተንቱ ዎዛና ቆፋ ድራዉካ ኤኖ ጋናዉ በሴ።

6 አያዉ ሳጥ፡ ጋድያ አይሰያዋንቱ ባረንቱ ኦሱዋ ኦልያ ዎደ፡ ጸሳዉ ኦልያ ድራዉ፡ ሀንተ ቃራጸ ቃንጽያዌ ሄዋሳ።

7 ኡባ አሳዉካ በሰያዎ እምተ። ጌራ ጌራናዉ በሰያዎ ገርተ፤ ቃራጸ ቃንጻናዉ በሰያዎ ቃንጽተ፤ ያያናዉ በሰያዎ ያይተ፤ ቦንቹ በሰያዎ ቦንቹተ።

እቱ እቱዋና ሲቀትተ

8 ሀንተንቱ እቱ እቱዋና ሲቀታናጥ አትን፡ ሀራ አጩ ኦ ቦላንነ ደኦጉ። አያዉ ሳጥ፡ ሀራ ሲቅያ ኦንነ ሀጊ ግያዎ ፖሌዳ።

9 “ዎሹዋጋ፤ ዎጲጋ፤ ዉኦጋ፤ አሳባ አምቶጋ” ግያ አዛዛቱነ ሀራ አዛዛቱ ኡባቱ፡ “ነ ሸሩዋ ነ ሁጲያዳን ሲቃ” ግያ አዛዛዋን ኩሚኖ።

10 ባረ ሸሩዋ ሲቅያ ኦንነ አዉ ኢታባ ኦፍ፤ ሄዋ ድራዉ፡ ሸሩዋ ሲቅያዌ ሀግያ ኡባዉ ኤኖ ግያዎ።

11 ገምእሹዋጥ ሀንተ ቤሳትያ ሳቲ ሀእ ጋኬዳ ድራዉ፡ ሀ ዎድያ አኬክተ። አያዉ ሳጥ፡ ኩን ኮይሮ አማኔዳ ዎድያጥ፡ ኩን አትያ ዎዲ ሀእ ኩኮ ማታቲዳ።

12 ቃማይ አቆናዉ ሀኔ፤ ጋላሳይ ማታቲዳ፡ ሰም ኩን ቆማ ኦሱዋ አጊደ፡ ፖኡዋን ኦለታናዉ፡ ኦላ ሚሻ ማኖይተ፤

13:9 ከሳ 20:13-15፣ 17፤ ዛረ. 5:17-19፣ 21፤ ዎጋ 19:18

13 ጋላስ ፖሎዎን ደእያ አሳዳን፤ አነ ማራ ደክይተ። የላንነ ማሉዎን ግደፖ፤ ዎሹሙሳንነ ዎሹማናዉ ካጄሉሳና ግደፖ፤ ፓሉማንነ ቃናትያን ግደፖ።

14 ሸን ጎዳ የሱስ ክርስቶሳ፣ ኦላ ሚሻ አ ማይተ፤ ህንተ ናጋራንቻ አሳተላይ ባረ ዎዛና አሙዎ ፖላናዳን፣ አዉ ቆፖፕተ።

14

አሳ ቦላ ፕርድናን አጉሳ

1 አማኑዎን አዛልያ ኡራ ሺሽ አክተ። ሸን እ ባረ ሁጸዉ ቆፕያባን አናና ፓሉሙቶፕተ።

2 እት ኡራ አማኑ እ አያ ሚናነ ድገና። ሸን አማኑዎን አዛልያ ኡራይ ጋደን ሞኬዳባ ጸላላ ሜ።

3 ኡባባ ሞያ ኡራይ ኡባባ ሜና ኡራ ካቶፖ፤ ኡባባ ሜና ኡራይካ ኡባባ ሞያ ኡራ ቦላ ፕርድፖ። አያዉ ጎፕ፣ ጸሳይ አ ሺሽ አኬዳ።

4 ሀራ አሳ ቆማ ቦላ ፕርድያዌ ኔን ኦኔ? እ ኩንድና ዎይ ደንድና ባረ ጎዳሳ፤ ሸን ጎዳይ አ ደንፋናዉ ዳንዳይያ ድራዉ፣ እ ኤቃና።

5 እት ኡራይ፣ “ህቃ ጋላሳይ ሀራ ጋላሳቱዎፕ አቆ” ያጊደ ቆፕያ ዎደ፣ ሀራይ፣ “ኡባ ጋላሳቱካ እት ማላ” ጊደ ቆፕ። አሳይ ኡባይ ሁጲያን ሁጲያን ሄዎዳን አያዉ ቆፕንቶ አኬኮ።

6 እት ጋላሳ ሀራ ጋላሳቱዎፕ አሏደ ቦንቶያ ኡራይ ጎዳ ቦንቶ ቦንቶ፤ ቁማ ሞያ ኡራይካ ጎዳ ቦንቶ ሜ። አያዉ ጎፕ፣ እ ሄ ቁማ ድራዉ፣ ጸሳ ጋላቲ። ቁማ ሚናዌካ ጎዳ ቦንቶ ሜናን አጌዳ፤ ቃይ ጸሳ ጋላቲ።

7 አያዉ ጎፕ፣ ኑፕ ኦንነ ባረ ሁጸ ጸላላዉ ደኤና፤ ቃይ ኦንነ ባረ ሁጸ ጸላላዉ ሀይቀና።

8 ኩን ፓጸ ደኦፕ፣ ጎዳዉ ደኤቶ፤ ቃይ ሀይቆፕካ፣ ጎዳዉ ሀይቆቶ። ሰሞ ኩን ፓጸ ደኦፕ ዎይ ሀይቆፕካ ጎዳሳ።

9 ሄዎ ድራዉ፣ ክርስቶስ ፓጸ ደእያዎንቶነ ሀይቆዳዎንቶ ጎዳ ግዳናዉ ሀይቆደ፣ ሀይቆዎፕ ደንዴዳ።

10 ያትና፣ ኔን ነ እሻ ቦላ አያዉ ፕርዳይ? ዎይ ኔን ነ እሻ አያዉ ካቶይ? ኩን ኡባይካ ጸሳ ፕርዳ ኦይድያ ሰንፋን ኤቃና።

11 አያዉ ጎፕ፣ ጸሳ ማጸፋይ፣
“ ናን ጎዳይ ታ ደኡዎን ጫቃይ፤
አሳይ ኡባይ ታ ሰንፋን ጉልባታና።

ቃይ ታን ጸሳ ግድያዎ፤
አሳይ ኡባይ ማርካታና፣ ያጋይ።

ያጌ።

12 ሰም ኑን ሁጲያን ሁጲያን ኑባ ጸሳዉ ኦዳና።

ናጋራ ኦሶ ጋሱዋ ግደፓ

13 ሄዋ ድራዉ፣ ኑን እቱ እቱዋ ቦላ ፕርድያዋ ሀዋፕ ሰንፋዉ
እነ አጎይተ። ሽን ኡባፕ አሊደ፣ ሀንተ እሻ ጴቢያባ ዎይ ናጋራን
ኦልያባ ኦርዳን ቆፋ ቃቸተ።

14 ታን ጎዳ የሱሰ ክርስቶሳና ደእያዋን፣ ባረ ሁጲዉ ቱና
ግድያባይ ባይናዋ ኤራይነ እኬካይ። ሽን እት ኡራይ እትባ ቱና
ጊደ ቆፖፕ፣ ሄዌ አዉ ቱና ግዴ።

15 ኔን ምያባ ድራዉ፣ ነ እሻ ቆሆፕ፣ ሰም ኔን ሲቁዋን ደአካ።
ክርስቶስ አ ድራዉ ሀይቄዳ አሳ ነ ምያ ቁማን ባይዘፓ።

16 ሰም ኔን ሎኦባ ግያዋ አሳይ ካጶፖ።

17 እያዉ ጎፕ፣ ጸሳ ካዉተላይ ጌሻ አያናይ እምያ ጽሎተላ፣
ሳርተላነ ናሽቻ ግድያዋፕ አትን፣ ሙሳነ ኡሻ ግደና።

18 እያዉ ጎፕ፣ ክርስቶሳዉ ሀዋዳን ኦልያ ኡራይ ኦንነ ጸሳ
ናሽቹ፤ አሳይካ አ ጋላቱ።

19 ያቸፕ፣ እነ ኑን ሳርተላ አሀያባነ ኑና እቱዋ እቱዋና ምንሰያባ
ኡባ ኮዬቶ።

20 ጸሳ ኦሶዋ ቁማ ድራዉ ባይዘፓ። ቁማይ ኡባይ ጌሻ፤ ሽን
ሀራ ኡራ ናጋራን የግያዋ ሙሳይ ኢታ።

21 ሄዎ አሹዋ ማናን ዎይ ኡሻ ኡሽናን አግያዌ ዎይ ነ እሻ
ጴቢያባ እያነ ኦርዳን አግያዌ ሎአ።

22 ሀ የዉዋን ነ አማኑዋ ኔፕነ ጸሳፕ ግዲዋን ናጋ። እት ኡራይ
ሎአ ጊደ እ አማነቲዳዋ ኦልያ ዎይ፣ “ታን ሎኡዋ አላድ” ጊደ
ባረ ዋዛናን አማነቶፕ፣ ሄ ኡራይ ቱሙ አንጀቲዳዋ።

23 ሽን እ ሄ ምያባን ሰጶኦፕ፣ አ ሙሳይ አማኑዋና ግደና
ድራዉ፣ ጸሳይ አ ቦላ ፕርዴ፤ ቃይ አማኑ ባይናን ኦሴዳዌ እያይኔካ
ናጋራ።

15

አሳ ናሽቻናዉ በሰያ ኦግያ

1 ኑን አማኑዋን ምኔዳዋንቱ ዳቡራንቻቱዋ ቶኩዋ ቶካናዉ
በሴ፤ ኑን ኑ ጸላላ ናሽቻናዉ በሰና።

14:11 እሳ. 45:23

2 ኑን ሁጲያን ሁጲያን ኑ እሻ ማዳናው፤ አማኑዋን አ ምንሳናውን ናሽቻናው በሴ።

3 እያው ጎጥ፡ ሀራይ አቶ ክርስቶስካ ባረና ናሽቻቤና። ሸን ጸሳ ማጻፋይ፡ “ኔና ቦሬዳዋንቱ ቦሬዳ ቦሪ ታ ቦላ ዎጴዳ” ጌዳዋዳን ሀኔዳ።

4 ጸሳ ማጻፋይ ኑው እምያ ገንጫንን ምኖታን ኑን ደማና ጊደ ናሽቻን ናግ ኡቲዳዌ ደአና ማላ፡ ጸሳ ማጻፋን ጸፈቲዳ ኡባባይ ኑና ታማርሳናው ጸፈቲዳ።

5-6 ህንተንቱ ኡባይ እት ዎዛና ግዲደ፡ እት ቃላን ጸሳ፡ ኑ ጎዳ የሱስ ክርስቶሳ አውዋ፡ ቦንቻና ማላ፡ ገንጨዋን ምኖተላ እምያ ጸሳይ፡ ህንተንቶ ክርስቶስ የሱስ ኑጩዳዋዳን፡ እቱ እቱዋና እትፕ ደእያ እት ቆፋ እሞ።

ጳውሎሳ ኡሱዋን አማና አሳው ጋኬዳ ምሽራቹዋ ቃላ

7 ሄዋ ድራው፡ ክርስቶስ ህንተንታ ሞኬዳዋዳን፡ ጸሳ ቦንቻ እቱ እቱዋ ሞክተ።

8-9 እያው ጎጥ፡ ጸሳይ አማኑቲዳዋ ግድያዋ ኤርሳናው፡ ጸሳይ አዋቶ እማና ጌዳዋ ቱማያናውን አይሁዳ ግደና አሳይ ጸሳ አ ማርተላ ድራው ቦንቻናው ክርስቶስ አይሁዳቶ ቆማ ግዴዳዋ ህንተንቶ ኡዳይ። ሄዋ ጸሳ ማጻፋይ፡

“ሄዋ ድራው፡ ታን ኔና፡
አይሁዳ ግደና አሳ ግደን ጋላታና፤
ነ ሱንላካ ሳባና”

ያጌ።

10 ቃይካ፡
“አይሁዳ ግደና አሳቶ፡

ጸሳ አሳቱዋና ናሽትተ”

ያጌ።

11 ቃይካ ጉጂደ፡
“ህንተንቶ፡ አይሁዳ ግደና አሳቶ ኡባቶ፡

ጎዳ ጋላትተ፤ አሳው ኡባው፡ አ ጋላትተ”

ያጌ።

12 ቃይካ እስያሰ፡
“እስይ ዘረሳይ ዪደ፡
አይሁዳ ግደና አሳ ሞዳናው ደንዳና።
ቃይ ኡንቱንቱ አ ባጋና ደማና ጊደ፡

15:3 ማዝ. 69:9 15:8-9 2 ሳሜላ 22:50፤ ማዝ. 18:49 15:10 ዛረ. 32:43 15:11 ማዝ. 117:1

ናሸቻን ናጋና”

ያጌ።

13 ህንተንቱ አካና ጊደ ናሸቻን ናግያዌ ጌሻ አያና ዋልቃን ድጫናዳን፤ ህንተንቶ እማና ጌዳ ጸሳይ፤ ህንተ አ አማንያ ድራዉ፤ ህንተንቶ ናሸቻን ሳርተላ ኩንሊደ እሞ።

ጳውሎስ ጸሊደ ጸፊዳ ጋሱዋ

14 ታናዳን አማንያዋንቶ፤ ህንተንቱን ሎኦተላይነ ኤራተላይ ኡባይ ኩሜዳዋን ቃይ እቱ እቱዋ ዘራናዉ ዳንዳይያዋ ታን ታ ሁጳዉ ኤራድ።

15-16 ሸን ታን ህንተንታ እትባ እትባ ጉጃ ቆፍሳናዉ፤ ሀ ዲብዳቢያ ግደን አይነ ያየናን ህንተንቶ ጸፋድ። ታን ክርስቶሳ የሱሳ ቆማ ግዳደ፤ አይሁዳ ግደና አሳዉ አላናዳን፤ ጸሳይ ታዉ አጵ ኬካተላ እሜዳ ድራዉ፤ ታን አይነ ያያበይከ፤ አይሁዳ ግደና አሳይ ጌሻ አያና ባጋና ጸሳዉ ጌሻ ግዳደ፤ አ ናሸቻያ ያርሹዋ ግዳናዳን፤ ጸሳ ዋንጋላ ሞሽራቹዋ ኦድያዋን ጌሻተላን አላይ።

17 ሄዋ ድራዉ፤ ታን ክርስቶሳ የሱሳን ግዳደ ጸሳዉ አላያባን ጨቀታናዉ ዳንዳያይ።

18-19 አይሁዳ ግደና አሳይ ጸሳዉ አዛዘታናዳን፤ ክርስቶስ ታ ባጋና ቃላን፤ ኦሱዋን፤ ማላን፤ ማላታ ዋልቃን ጌሻ አያና ዋልቃን ኦሌዳዋ ጸላላ ታን ኦዳናፕ አትን፤ ሀራባ ኦዳናዉ ጸልከ። ሄዋ ድራዉ፤ የሩሳላመፕ ደማደ፤ አልዋርቆና ጌተትያ ጋድያ ጋካናዉ ዩያደ፤ ክርስቶሳ ዋንጋላ ሞሽራቹዋ ወርሳ ኦዳድ።

20 ሀዋዳንካ፤ ታን ሀራ አሳይ ደሜዳዋ ቦላን ደመናዳን፤ ክርስቶሳ ሱንላይ ጴስትቤናሳን ዋንጋላ ሞሽራቹዋ ኦዳናዉ አሞታድ።

21 ሸን ጸሳ ማጸፋይ፤

“አባይ ሀዋ ጋካናዉ ኦደትቤናዋንቱ አ በአናዋንታ፤

ቃይ አባ ሰሰቤናዋንቱ አኬካናዋንታ”

ያጌ።

ጳውሎስ ሮመ ባናዉ ቆፔዳ

22 ሄዋ ድራዉ፤ ታን ጮራ ዋደ ህንተንቱኮ ያናዉ ኮያይ፤ ሸን ያናዉ ዳንዳያበይከ።

23 ሸን ታን ሀእ ሀ ሄራን ታ ኦሱዋ ወርሴዳ ድራዉነ ጮራ ላይፋፕ ደማደ ህንተንታ ባደ በአናዉ ላሞቴዳ ድራዉ

24 ሀእካ ህንተንቱኮ ባና ጋደ ቆጋይ፤ ታን እስፔነ ጌተትያ ጋድያ ባደ ህንተንታ በእናው ኮያይ፤ ቃይ አማራዳ ዋድያ ህንተንታ በአደ ናሸቶዋፕ ጉይያን፣ እስፔነ ቢሸን፣ ህንተ ታና ማዳና ማላ ኮያይ።

25 ሸን ሀእ ታን ጸሳ አሳቱዋ ማዳናው፣ የሩሳላመባይ።

26 አያው ሳፕ፣ ማቅዳንያነ አካይያ ጌተትያ ጋድያን ደእያ ዋሳ ጎላ አሳቱ የሩሳላመን ደእያ ህዬሳቶ ሚሻ አማናው ኮዬድኖ።

27 ኡንቱንቱ ባረንቱ ሁጸው ሀዋ ኦላናው ቆፋ ቃቼድኖ። ኡንቱንቱ ሄ ህዬሳቱዋ ማዳናዌ ኡንቱንቶ አጩ ደኤ፤ አያው ሳፕ፣ አይሁዳቱ ባረንቱ አያና አንጂዋ አይሁዳ ግደና አሳቱዋና ሻኬዳዋ ግደፕ፣ አይሁዳ ግደና አሳቱካ ቃይ ባረንቶ ደኤዳባን አይሁዳቱዋ ማዳናው በሴ።

28 ሄዋ ድራው፣ ታን ሀ ኦሱዋ ወርሴዳዋፕ ጉይያን ኡንቱንቶ ሸቄዳ ሚሻ ኡባ አሜዳዋፕ ጉይያን፣ እስፔነ ባደ ህንተ ማታና አጳና።

29 ታን ህንተንቱኮ ብያ ዋደ፣ ክርሰቶሳ አንጂ ታናን ኩምና ባናዋ ኤራይ።

30 ታናዳን አማንያዋንቶ፣ ታው ጸሳ ህንተ ዋሲደ፣ ዋሳን ህንተ ታናና ምናናዳን፣ ጎዳ የሱስ ክርሰቶሳ ባጋናነ ጌሻ አያናይ እምያ ሲቆተላን ታን ህንተንታ ዋሳይ።

31 ታን ይሁዳን ደእያ አማነናዋንቱፕ አታናዳንነ ቃይ ታን የሩሳላመን ኦልያ ኦሱ ያን ደእያ ጸሳ አሳቱዋ ናሸችያዋ ግዳናዳን፣ ጸሳ ዋሰተ።

32 ቃይ ጸሳይ ሳፕ፣ ታን ህንተንቱኮ ናሸቻን ባደ፣ ህንተ ማታን ሸምፓና።

33 ሳርተላ ጸሳይ ህንተንቱና ኡባና ግደ። አመንእ።

16

ሳርታ

1 ክንክርያ ጌተትያ ካታማን ደእያ አማንያ አሳና ኦልያ ኑ ሞቻታ ፔባ ሎኦ ማጫ አሳ ግድያዋ ታን ህንተንታ ኤርሳይ።

2 ህንተንቱ እዞ ጌሻቱ ጎዳ ሱንላን ሞክያዋዳን ሞክተ፤ ቃይ እዛ ህንተንቱፕ ኮይያዌ አያ ግደፕካ፣ እዞ ማድተ፤ አያው ሳፕ፣ እዛ ባረ ሁጸው ጮራ አሳ ማዳው፤ ቃይ ታና ታ ሁጸውካ ዳርሳ ማዳው።

3 ክርሰቶሳ የሱሳ ኦሱዋ ታናና እትፕ ኦልያ ጵርሰቁልውነ እዞ አሰና አቁላስ ታ ሳርቶዋ ኦድተ።

4 ኡንቲንቲ ታ ሸሞጥዋ ድራው፡ ባረንቲ ሸሞጥዋ አሉ እሚድኖ። ኡንቲንታ ታ ጸላላ ግድናን፡ አይሁዳ ግድና አሳ አማንያ አሳይ ኡባይካ ጋላቲ።

5 ቃይ ኡንቲንቲ ጎልያ አማንያ አሳይ ሺቅያሳ አሊደ ጋከትያ አሳ ኡባ ሳሮ ጊተ። ኢሰያ ጋድያን ክርሰቶሳ ኮይሮ አማኔዳ ታ ሲቅያ ኤፓንቶሳው፡ ታ ሳሮቶዋ ኦድተ።

6 ህንተንቶ ሎይላ ዳቡሬዳ ማይራሞ ሳሮትተ።

7 ታናና ቃሾ ጎለን ደኤዳ ታ ዳቦ ግዴዳ አይሁዳቱዋ፡ አንድሮንቆሳን ዩንያሳ ሳሮትተ። የሱሰ ኪቴዳዋንቲ ግድን ኡንቲንቲ ሎይላ ኤረቴዳዋንታ። ቃይ ኡንቲንቲ ክርሰቶሳ ታፕ ካሰና አማኔድኖ።

8 ጎዳና እትፕተሳን ደእያ ታ ሲቆ ላግያ አሞፕልያቶሳው ታ ሳሮቶዋ ኦድተ።

9 ክርሰቶሳ ኦሱዋ ኦናና እትፕ ኦልያ ኡርባኖሳን ታን ሲቅያ አሰጸኩሳ ሳሮትተ።

10 ክርሰቶሳና እ ደእያዌ ኤረትና ፓጭያ ጸኔዳ አጸለሳው ታ ሳሮቶዋ ኦድተ፤ አርሰጸ-ብሎሳ ሶይ አሳውካ ታ ሳሮቶዋ ኦድተ።

11 ታ ዳቦ ግዴዳ አይሁዳዊያ ሄሮድዮናን ክርሰቶሳ አማንያ ናርሲሰሳ ሶይ አሳ ሳሮትተ።

12 ጎዳ ኦሱዋን ዳቡርያ ትሩፋይናን ትሩፎሶ ጌተትያ ማጫዋንታ ሳሮትተ፤ ቃይ ጎዳው ዳሮ ዳቡራድ ኦልያ ሲቅያ ፐርሲሶ ሳሮትተ።

13 ጎዳ ኦሱዋን ሎይላ ኤረቴዳ ሩፎሳየወን ታና ባረ ናኦዳን ማዴዳ አ ዳይዉ ታ ሳሮቶዋ ኦድተ።

14 ታ ሳሮቶዋ አሰንክሪቶሳው፡ ፕሌጎናው፡ ሄርሜሳው፡ ፓትሮባሳውን ኡንቲንቲና ደእያ አማንያ እሻቱዋ ኡባው ኦድተ።

15 ፕሌጎና፡ ዩሎ፡ ኔርያ፡ አ ሞቻቶ፡ ኦሎሞፖሳን ኡንቲንቲና ደእያ ጸሳ አሳቱዋ ኡባ ሳሮትተ።

16 ጌሻ አሳው በሰያ የረታ የረቲደ፡ እቱ እቱዋ ሳሮትተ፤ ክርሰቶሳን አማንያዋንቲ ኡባቲ ህንተንታ ሳሮ ያጌድኖ።

ወርሰላ ዘርያ

17 ታናዳን አማንያዋንቶ፡ አሳ ግዴን ሻኮተላ መድያዋንታ፡ አሳ አማኖ ቆቦ ግድያዋንታን ህንተ ታማሬዳ ትምርትያና ጋከተናዋ ታማርሲያዋንታ አኬካናዳን፡ ታን ህንተንታ ዋሳይ። ኡንቲንቲኩ ሺቆፕተ።

18 እያዉ ጎጥ፡ ሄዎ ማላባ ኦሎጎግቱ ባረንቱ ኡሎ ኦሊናፕ ኦትን፡ ኑ ጎዳ የሱስ ክርስቶሳዉ ኦሎክኖ፤ ባረንቱ ላብያ ሃሳያንን ቅድያን ኢታባ ቆፐና ኦሳ ዎዛና ባለሊኖ።

19 ዎንጋላዉ ሀንተ ኦዛዘቴዳዎ ኦሳይ ኡባይ ሰሴዳ። ሄዎ ድራዉ፡ ታን ሀንተባን ናሸታይ፤ ሸን ሎኦተላዉ ሀንተ ኦዴዳ ኤራንቻ ግዳናዳንን ቃይ ኢታባዉ ኦሸከ ግዳናዳን ኮያይ።

20 ሳሮተላ ጸሳይ ሴጸና ሀንተ ገድያፕ ጋርሳና ሃከና ማታ ዎደ ጋጫና።

ኑ ጎዳ የሱስ ክርስቶሳ ኦዴ ኬካተላይ ሀንተንቱና ግድ።

21 ታናና ኦሎጎ ጽዋቶስ ሀንተንታ ሳሮ ያጌ፤ ቃይ ሀዎዳንካ፡ ታ ዳባቱ ሉቅዮስ፡ ያሶን ሶሲጸጽሮስ ሀንተንታ ሳሮ ያጌና።

22 ታን፡ ጸርጽዮስ፡ ሀ ዳብዳቢያ ጸፊዳዌ፡ ሀንተንቶ ጎዳ ሱንላን ሳሮታ ኪታይ።

23 ኦማንያ ኦሳይ ኡባይ ኦ ሶይን ሺቅያ ታ ሲራ ጋዮስ ሀንተንታ ሳሮ ያጌ፤ ካታማ ሚሻ ኦይቂያ ኤራስጸስ ኑ ኦሻይ ቁዎርጸስ ሀንተንታ ሳሮ ያጌና።

24 ኑ ጎዳ የሱስ ክርስቶሳ ኦዴ ኬካተላይ ሀንተንቱና ኡባና ግድ። ኦሚንኦ።

25 ኑን ጸሳ ጋላቴቶ። ታን ዎንጋላ ባጋና የሱስ ክርስቶሳባ ኦዴዳዎዳንን ዳሮ ዎድያፕ ጌሚደ፡ ሀኦ ቆንጩዳ ቱማተላዳን፡ ሀንተ ኦማኑዎን ሀንተንታ ጸሳይ ሞንሳናዉ ዳንዳዬ።

26 ሸን ሀኦ ናባቱ ጸፊዳዎ ባጋና ቱማተላይ ቆንጩያን ኤረታናዳን ኦሴዳ፤ ቃይ ኦሳ ኡባይ ጸሳ ኦማኒደ ኦዛዘታናዳን፡ ማድና ጸሳ ኦዛዘታን፡ ሀ ኦላሞያን ደኦ ኦሳ ዘረላ ኡባዉ ቆንጩዳ።

27 ኦዴዳ ኤራተላይ ኦ ጸላላዉ ደኦ ኦት ጸሳዉ የሱስ ክርስቶሳ ባጋና ማድናዉ ቦንቹ ግድ። ኦሚንኦ።

ጌሻ ማጻፋ

The Holy Bible in the Dawro language of Ethiopia

copyright © 2011 Wycliffe Bible Translators, Inc.

Language: Dawro

Translation by: Wycliffe Bible Translators, Inc.

Contributor: The Word for the World International

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Dawro

© 2011-2024, Wycliffe Bible Translators, Inc. and The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-01

PDF generated using Haiola and XeLaTeX on 2 May 2025 from source files dated 1 May 2025

585b63ca-b8e6-55c8-bfef-10bdc95ad69c